

# Jonida alikamu lo moloko lo mibo ga

Jisesikaho le wesama oko libo ga.

**1** Jisesikaho lo wesama oko libo ga maya onawa hana wamideko soto pitiye loko Omailimo lo molaibo nesa maya Omaimidana elekele wewenalesida lo bitiye loko Jisesida lo mekaiyoko, Jisesikaho okanaki wemidana leko oli hekaiyoko, lemeko elekele wela nemo Jonida lo nemeko nilipiye. <sup>2</sup>Sa-okaiyoko, nemoya Omaimidana epalauti ga ito Jisesi Kalaestikaho lo soto molaibo gaya ele wehe lobomuye loko elemindanaki, maloya lo soto moloko lo noliboe. <sup>3</sup>Ito luhuwa maya niseko ulolotetibo onawaya alo alili okaibo nenako, alika nesamuya ga mayaki wetome iki li bikadeko elitabo wewenasiya ito maya luhuwa elikiki eli litabo wewenasiya Omailimo maku bibo wewena minakilae.

Omaimidana wewenala yuha laini 7-palasida maku bibo ga.

<sup>4</sup><sup>a</sup>Nemoya Jonikahoya Omaimidana wewenala yuha laini 7-pala Esiya ebakuka minabosida luhuwa nesa maya je noliboe. Omai omutoko nebo ito olotiki aha nebo wema aku wili jeko nisekolaibo welokati ito abuhawowola 7-pala nebo weuna Oluho onoweyaki siyalo nebo welokati, <sup>5</sup><sup>b</sup>ito Jisesi Kalaestitokati nasahili ito hulu maya edimotoka mino moloko minadeyo. Jisesikahoya Omaimidana gala wetome oko emesalo molokaka we, ito ada ipala helenebokuti sinaibo weya, ito numuto namato wewenasida we napanipolesida ahonipo, eimola ukala limidanaki lahelamibo nesauti maya lilimiye. <sup>6</sup><sup>c</sup>Sa-okadanaki, eimola ahola Omaida mekadeko netiye loko emo oholahuya jokila hemekaka weya lilime molaiye. Eimolatokaya onowellaki abuha-wowolaki elewoleyalaki neboya, mino-loko woko minakolaiye. Yotokoe.

<sup>7</sup><sup>d</sup>Eli-minahe, limu mupilaloya nisideko muki wewenasiya muda-elakilae. Ito Jisesida aholau aluka hebo wewenasiya muda-elakilae.

<sup>a</sup> 1:4 Eks 3:14; Lev 4:5    <sup>b</sup> 1:5 Aes 55:4; Sam 89:27    <sup>c</sup> 1:6 Eks 19:6; Lev 5:10

<sup>d</sup> 1:7 Den 7:13; Jon 19:34-37; Jek 12:10; Mat 24:30

Ito muki numuto namato wewenasikiya muda-ekiki gala elamabomuye liki wije nama likilae. Aya gaya sa-loko soto pideyo. Yotokoe. <sup>8</sup><sup>e</sup>We napa Omaiya ode amode nesa lolo okaka we omutoko nebo ito olotiki aha nebo welimo aku nisekolo noibo welimoya nemogoya api okaka ito leko suwokaka ahola minoe loko noliye.

### Jisesida weuna muda-elaibo.

<sup>9</sup>Nemo wewenatipo Jonikahoya edimokiya Jisesikumukiye loko Omailimo ujapa olimikakamidana elewoleya ito miluma-aluma ito edawaki nesa ohilitikayoko, ona moloko lekudanaki minokaka noudawo wewenalita nemo luhuwa maya je noliboe. Nemoya Omaimidana gala ito Jisesida uliwa lo soto moloko lobomuye liki Patamo mika ovalau maya noli hiki hulikayoko woko minoe. <sup>10</sup>Sakoya minodanaki We napamidana onawalauya Omaimidana weuna oluholimo nukamidana omudala le pana kekaiyoko, nemesaloka maya ga napa mako pikulikidana soto piye. <sup>11</sup>Sakoya soto piyoko, sa-loko eloe: Saina nomudadawoya pepau luhuwa jekoko wewenanele yuha laini 7-pala minabotoka hulikadeko, Epesisi numutoka ito Similina numutoka ito Pelagamu numutoka ito Tiyatila numutoka ito Saliti numutoka ito Pilatelepiya numutoka ito Laodisiya numutoka wetiye.

<sup>12</sup>Ito ga lo nimibo wemidana maya muda-elatuwe loko mino wili jordanaki mudaoboya lamu jo le 7-pala golidunu lolo aboya mudaoe. <sup>13</sup><sup>f</sup>Sakoya le luwaku makoya neyoko mudaoe. Emoya wewenakidana nedanaki, lawo-lawo hana-pana le kolokoko ne. Ito ohalaloya golidunu lolo abo ebe ne. <sup>14</sup><sup>g</sup><sup>h</sup>Ito madona yopalaya limukidana ukulo loko ne, ito omudala maloka malokaya jo ulumakidana ne. <sup>15</sup><sup>i</sup>Ito ila maloka malokaya goli ehada joku lokadanaki isi isi libomidana oko ne. Ito enolaya no lisada napakidana sasa loko ne. <sup>16</sup>Sakoya adela lamawakalokaya sonohi 7-pala lene. Ito epalautiya emita makoya emesaloka ito epawaloka naibo makoya leneyoko mudaoe. Ito okepaloka omudaukaya hokidana lelaya he hada oko lamedala loneyoko mudaoe. <sup>17</sup><sup>j</sup>Sakoya upala maya nemakahoya nomudaloti mudakodanaki, lemeko pou liyoko ilauka maya udoe. Sakoya lemeko helebokidana oko udominoyoko, adela lamawakama mupilanelo molonedanaki sa-loko lo nimiye: Emoya omodaka wamideyo. Omutoko, ito alika moloko, <sup>18</sup>ito elewole aholaya nemo maya minoe. Ele-minape. Nemoya helekoko sinobo welimoya mino-loko woko minakoloe. Ito helekakamidana ito ono mola molamidana ateto kiwaya nemo makoko le-minoe. <sup>19</sup>Saina mudadawolawama oloti mudadawo nesa ito alika soto pitibo nesakiya

<sup>e</sup> 1:8 Lev 22:13   <sup>f</sup> 1:13 Den 7:13; Den 10:5   <sup>g</sup> 1:14 Den 7:9   <sup>h</sup> 1:14-15 Den 10:6

<sup>i</sup> 1:15 Iji 1:24; Iji 43:2   <sup>j</sup> 1:17 Aes 44:6; Aes 48:12; Lev 2:8; Lev 22:13

muki olotikogo luhuwa jeko suwo. <sup>20</sup>Ito nade lamawakalokaya sonohi 7-pala mudadawoki ito lamu le golidunu lolo abo 7-pala mudadawokiya suna nesamidana monawa lo imituyo, elo. Sonohi 7-palaya Omaimidana wewenalale yuha laini 7-pala ujapa nitabo we okananipoki wewena yamidana iki minae. Ito lamu le 7-palaya monoka emesalo molabo wewena laini 7-palamidana aweyahawa minae.

### Ipisiyoni wewenasitoka ga hulaibo.

**2** <sup>1</sup>Kolo meko sa-loko lo nimiye: Epesi numutokaya Omaimidana wewenala yuhasida okanaki wekidana ujapa nobetaibo wemo sa-loko luhuwa je mekadeko lo bitiye: Sonohi 7-pala ade lamawakaloka lenebo we lamu 7-pala golidunu lolo abo luwanipou woko niseko okaka noibo welimoya edimokumuya sa-loko noliye: <sup>2</sup>Nemoya iki moliki ikaka niabomidana monawa, ito yowanunipomidana monawaya osele delamiyoko dabuha molikaka niabomidana monawa ele-minoe. Ito edimoya wewena lahelabo lahelamabo omusepanipo yowekaka noiye. Ito maloka wewenasiya lemokiya aposolo minune likadanaki, suwa likayoko suwanipomidana monawa maya li soto molikae. <sup>3</sup>Ito dabuha moliki miniki nemokumuye liki miluma-aluma eliki miluma-alumamidana mupilaloya osele delamiyoko hulu iki minikae. <sup>4</sup>Sa-oneboya, edimoya sabokumuya eloyoko adoha nesa ilekaka noe. Edimoya hapa yeikala maya duka nimikaka abomidana oloti onawaloya ma minamiye. <sup>5</sup>Hapa yeikala abo nesa liki olotiya monokau wati iki minahekela, aloya limiki udikae. Olotiya yamuya aku elikiki duka li wili jiki hapa anulo maya emesalo moliki witae loko yamuya noloe. Samideko, nemokahoya edimotoka niseko lamu letibo maya jeko hekoloe. Duka li wili jamitaboya sakoya sa-olibetakoloe. <sup>6</sup>Ito makoya edimokumu adoha elekaka noe. Edimo Nikolaeda wewenala yuhasiya anulo nesa adoha lolo ikaka niabomu depauka auha likaka niae. Ito nemoya asako nemesamekaka noe. <sup>7</sup>Omaimidana weuna oluholimo Omai wewenalalesida ga mako sa-loko lo nobiboya datauka golotonetibo wewenalita wehe liki elilo. Ito malokasiya monokauya elewole iki wiki Olohamidana lowa hiki kohaki asitataboya elewole oko minokakamidana ya ihilawa Omaimidana ya yuhalauka neboya natae loko ele libekoloe loko noliye.

### Similina wewenasitoka ga hulaibo.

<sup>8</sup><sup>1</sup>Ito Similina numutoka Omaimidana wewenala yuhasida okanaki wekidana oko ujapa nobetaibo wemo sa-loko luhuwa jeko mekadeko lo bitiye: Emoya omutoko alika moloko helekadanaki sinaibo welimoya edimokumuya sa-loko noliye: <sup>9</sup>Edimoya miluma-alumamidana mupilalo

<sup>k</sup> 2:7 Jen 2:9   <sup>1</sup> 2:8 Lev 1:17

dilipi-liki wiki hulilibitikayoko, uvaminanipo minamibo wewena minaboya ele-minoe. Ito monokamidana uvaminalaki minae. Ito Juda wewena minune liki likaka niabo wewenasiya edimodaya liwi letiwi ikaka niae. Sa-ikaka niayoko, nemokahoya yamukiya ele-minoe. Sa-ikaka niaboya, edimoya suwa likaka niae, Juda wewena ulawa wehe liki minamae. Olohamidana wewenala yuha wehe liki minae.<sup>10</sup> Sa-iminanako, dupalokaya akuya miluma-aluma nesa soto pekolaiye. Sa-ekolaiyo, yamuya domodatipo wamideyo. Eli-minahe. Olohalimo mimi molatiye loko edimokuti malokasidaya dilipe nala numuku molakolaiye. Sa-okadeko, miluma-aluma elitabo onawayo onawa lasolas 10-palago li hulakilae. Edimosiya monokaya li ikitiki li-miniki helikadeko, onowelaki adakoli yakidana elewole oko minokakamidanaya le olo jelibetakoloe.<sup>11</sup> <sup>m</sup>Omaimidana weuna oluholimo Omaimidana wewenala yuhasideya yamidana ga lo nobiboya datau golotonetibo wewenalita, eli wehe liki elilo. Ito malokaya monokau elewole iki miniki Olohamidana lowa hi miki asitatabolawaya helekaka nesalimoya ma dilipe opa napa amekolaiye, loko noliye.

### **Pelagamu wewenasisitoka hulaibo ga.**

<sup>12</sup> Ito Pelagamu numutoka Omaimidana wewenala yuhaside okanaki wekidana ujapa nobetaibo welimo sa-loko luhuwa je mekadeko lo bitiye: Emita epaloka emesalokaki naibo emitanebo welimoya edimokumu sa-loko noliye: <sup>13</sup> Edimo minabo ebamidana monawalaya ele-minoe. Yauya Olohamidana wewenala yuha minae. Edimosiya gahenane ito nulinehenaneya li ikitiki li-minikaka niae. Ito Olohalimo minokaka noibo ebakuya nemo ane lo mobotogo lo libekaka noibo we Atipasada kohabo yupeka edimosi nemokumu eli elewole abo nesatipo maya hulamabo ne. <sup>14</sup> <sup>n</sup>Sako neboya, nemokaho edimokumu lasolasima eloyoko lahelamo okaka noiye. Edimo ebatipouti maloka wewenasiya Balamuda emesalo molikaka niae. Balamukaho Baelakidaya Isilaelo wewenaside lo bitibo gamu lo mekaiyoko emokaho ula molaiyoko luweha nesamidana miyuhalu niki miniki anulo moniki pasidiyalo minadanaki lahelamae. <sup>15</sup> Asaiki ebatipouya Nikolaeda wewenala malokasiya lahelamibo monawa likadanaki asaiki lahelamae. <sup>16</sup> Sa-onebo neyo, edimoya duka li wili jilo. Sa-nideyama, nemokaho edimotokaya alinali niseko aya wewenasideya nepadunu lowa he bekoloe. <sup>17</sup> <sup>p</sup>Omaimidana weuna oluholimo Omai wewenalalesida ga sa-loko lo nobiboya datauka golotonetibo wewenalita, eli wehe lilo. Malokasiya monokau elewole i-liki niwiki Olohamidana lowa hi miki asitatabolawaya suna onebo mana nodenesa lalo maya

---

<sup>m</sup> 2:11 Lev 20:14; Lev 21:8   <sup>n</sup> 2:14 Nam 22:5; Nam 25:1-3   <sup>o</sup> 2:17 Eks 16:14-15,33-34;  
Jon 6:48-50   <sup>p</sup> 2:17 Aes 62:2; Aes 65:15

libekoloe. Ito ukulo ehadaya makoko makoko oko libekoyoko, yaloya dulinipo luhuwa ohatama minadeko, ehada uliwamidana monawaya ehada ahola eimolakaho elene, loko noliye.

### Tiyatila wewenositoka hulaibo ga.

<sup>18</sup> Ito Tiyatila numutoka Omaimidana wewenalale yuhaside okanaki wekidana oko ujapa nobetaibo wemo sa-loko ga luhuwa je mekadeko lo bitiye: Omaimidana ipalaya omudala jo ulumakidana oko nebo welimo ila golo ehada joku lokadanaki isi isi lokaka noibomidana oko nebo welimoya edimokumya sa-loko noliye: <sup>19</sup> Nemokahoya iki moliki ikaka niabomidana monawa, ito duka bikaka niabomidana monawa, ito eli elewole iki minikaka niabomidana monawa, ito nasahili ibitikaka niabomidana monawa, ito edawaki nesamidana ulauya hulu iki minikaka niabomidana monawa ele-minoe. Adaya dabuha moliki lasola minaboma olotiya yowikae, yakiya ele-minoe. <sup>20</sup> <sup>a</sup>Ito nemokahoya edimokumu sakoya eloyoko lasolama lahelamiye. Edimoya Isilaelo wewenaside ulilaki mena lahelamibo Jesabelokidana minabo menakipasidaya mudaidi hulikaka niayoko, aya menalimo monoka lokaka mena minoe lokadanaki, wewenanele yuhaside maya ga lo bekaka oko dokepa jidanaki ula molokaiyoko, anulo monikaka yowanu ledanaki luweha nesamidana miyuha liki nikaka niae. <sup>21</sup> Ito ukala le wili jitiye loko onawala moloetoboya, emo ukala le wili jamidanaki anulo monekaka nesala maya hulatibo nesa lamiye. <sup>22</sup> Eli-minahe. Nemokahoya yamuya lokoyoko elokaka nesaya soto pe mekadeko mudakoko udonetiye. Sa-noidanaki, emoki eimolaki anulo monikaka niabo wewenositoka miluma-aluma nesa napa-napa soto pitiye. Dukanipo li wili jikiki aya menamidana anulo nesanipoya hulamidekoma, yamidana nesaya dupaloka soto pekolaiye. <sup>23</sup> <sup>b</sup>Ito aya menamidana oluholasidamuya lokoyoko oliwaki nesa soto pekoko kohaido suwetiye. Sakoyoko, muki numuto namato monoka emesalo molabo wewenasiya nemokumuya duka datamidana monawa muda wehe loko muda-minane liki eli wehe liki elitae. Nemoya muki wewenasi iki moliki abomidana lelitelilo pasoko libekoloe, loko liye.

<sup>24</sup> Ito Tiyatila numutokaya maloka wewenasiya aya suwa gaya eli hulikaka niae. Sa-niadanaki, maloka wewenasiya Olohamidana monahanala maya ele wehe loko ele-minune likaka niabo wewenasideya ganipo elamae. Sa-ikaka niabo wewenasideamuya noloyo, elilo. Nemokahoya edawaki nesa malokaya dupatipolo molamekoloe.

<sup>25</sup> Ito li-minabo nesaya li ikitiki li-minalo. Sa-iliki niwidekoya aku nisituwe. <sup>26</sup> <sup>c</sup>Malokasiya onawa suwetiboto monokau elewole i-liki wiki

<sup>a</sup> 2:20 1 Kin 16:31; 2 Kin 9:22    <sup>b</sup> 2:23 Sam 7:9; Jel 17:10; Sam 62:12

<sup>c</sup> 2:26-27 Sam 2:8-9

Olohamidana asitiki nemokaho oko moloko obomidana iki, iki moliki i-liki wiki li ikititabolawaya nemokahoya abuha-wow libekoyoko, aito aito mikauka wewenasida we napanipo lolo iki minatae.<sup>27</sup> Ahonetokatiya abuha-wow lobomidana libekoyoko aini akusakidana li-miniki ujapa ibitatae. Sa-iminiki mika somo jeko posekaka noudawomidana iki sa-ibitatae.<sup>28</sup> Ito sonohi napa ludaka mudaokaka noudawo abili dum-dumaya libekoloe.<sup>29</sup> Omaimidan weuna oluholimoya Omai wewenala yuhasida sa-loko lo nobiboya datauka golotonetibo wewenalita, eli wehe liki elilo.

### **Saliti wewenasitoka hulaibo ga.**

**3** <sup>1</sup>Kolo meko sa-loko lo nimiye: Saliti numutoka Omaimidan wewenala yuhasida okanaki wekidana ujapa nobetaibo wemo sa-loko luhuwa jeko mekadeko lo bitiye: Omaimidan weuna oluhoya abuha-wowola 7-pala nebo ito sonohi 7-pala lenebo welimoya edimokumu sa-loko lokaiye: Nemokahoya iki moliki abomidana monawa ele-minoe. Wewenasiya mudaaidaboya domudaki minabo eleneboya dukatipoya helenebo minae. <sup>2</sup>Sa-onebo nenako, malokaya helikabo maya momoga iki sinikiya data kitabolawa yeimaya li elewole ibitalo. Nemoya Omaimidan omudalo iki moliki ikaka niabo nesaya mudaoboya wehe lamiye. <sup>3</sup>Edimosiya saina-mainahenama api ilibitiki data leboma li ohatama iki li ikitiki li-miniki duka li wili jilo. Li wili jikiki ujapa iki minamitaboya lowa he libekoloe. Nolobo onawayan edimosiya elamideko, ukelelo wekidana enemane oko nisekoloe. <sup>4</sup>Saliti numutoka maloka wewena minabosiya iki moliki abo nesatipoya li huma jamae. Ito yamidana wewenaya miniki iki moliki itabolawaya wati aminako, li-miniki nemoki moniki miniki liki ikilae. Edimosiya sa-itabo nesa liki minae. <sup>5</sup><sup>u</sup>Maloka wewenasiya monokau elewole i-liki wiki Olohamidana asitatabosiya miniki liki itabolawaya dukauya dilipe ukulo letibo nesa libekoyoko, li kolakilae. Ito dulinipoya elewole depa mutiwaki minabo wewenasida dulinipoya bukugutiya uliye hulamekoloe. Nemokaho ulinipoya ahoneda omudalo ito okanaki wewenasida domudalo lo soto molakoloe. <sup>6</sup>Omaimidan weuna oluholimo Omaimidan wewenala yuhasida sa-loko lo nobiboya datauka golotonetibo wewenalita, eli wehe liki elilo.

### **Pilatelepiya wewenasitoka hulaibo ga.**

<sup>7</sup><sup>v</sup>Ito Pilatelepiya numutoka Omaimidan wewenalale yuhasida okanaki wekidana ujapa nobetaibo wemo sa-loko luhuwa jeko mekadeko lo bitiye: Nisomao loko lo moloko minokaka ito liyoko elewole okaka

<sup>t</sup> 3:3 Mat 24:43-44; Luk 12:39-40; Lev 16:15    <sup>u</sup> 3:5 Lev 20:12; Mat 10:32; Luk 12:8

<sup>v</sup> 3:7 Aes 22:22

welimo Dewitida atedalamidana kiwa le-minadanaki, anu siyekaka noibotoya wewena makolimo woko le ilitamekolaiye. Ito anu vetibotoya wewena makolimo anu siyametibo welimoya edimokumuya sa-loko noliye: <sup>8</sup>Nemo iki moliki ikaka niabomidana monawa ele-minoe. Eli-minahe. Nemokahoya domudaloya anu siyelibetoyoko, wewena makolimo aku anu jeko li lolibetamekolaiye. Edimoya elewoleyatipo lasolasineboya ele-minoe. Ito opaya nemo aneya eli-minadanaki ulinewaya hulamabo ne. <sup>9</sup><sup>w</sup>Eli-minahe. Edimoya Olohamidana lainilautiya maloka wewenasiya Juda wewena minune liki likaka niabosiya suwa likadanaki Juda wewena ulawa minamae. Nemokahoya edimoda ula molokoyoko, edimotoka nisiki di bola hi libikilae. Sa-nikiya edimokumuya nukane beminobo wewena minae liki elikilae. <sup>10</sup>Edimoya osele-pasele amiki newa iki minatae loko lolibetobo ganewaya eli wehe liki eli-minabo nenako, yamuya mulutipou hekaka onawaya numuto namato wewenasitoka je-loko wetiboya, edimotoka je-loko wokatiye loko nemoya dilipe oho ulau mololibetoko dilipe lalo ekoloe. <sup>11</sup>Nemoya enemane oko nisekolonako, yamuya wewena makolimo onowelaki adakolitipo maya suwatokatiye liki saina mainatipo li-minaboya li ikitiki li-minalo. <sup>12</sup><sup>x</sup>Monokau elewole iki mini-liki wiki Olohamidana asitataboya Omaimidanamonoka numudala napau ahodawakidana libekoyoko, yauya elewole iki minikiaku hetokaya ulu-kalu lemamikilae. Mupilatipoloya Omaimidana uliwa luhuwa ito ebalamidana uliwa luhuwaya sa-loko jekoloe: Yaya Jelusalemu eba ohatamaya okulumautiya Omailokatiya lemekolaiye. Ito nemo nuline ohatamakiya edimo mupilatipolo jekoloe. <sup>13</sup>Omaimidana weuna oluholimo sa-loko Omaimidana wewenalalesida lo biboya datauka golotonetibo wewenalita, eli wehe liki elilo.

### Laodisiya wewenasitoka hulaibo ga.

<sup>14</sup>Ito Laodisiya numutoka Omaimidana wewenala yuhasida okanaki wekidana ujapa nobetaibo wemoya sa-loko luhuwa je mekadeko lo bitiye: ga watiya lokakamidana monawa nebo we ito awa lokaiyoko elewole okaka noibo we Omailokati saina soto pibo monawa nebo welimoya edimokumu sa-loko noliye: <sup>15</sup>Iki moliki ikaka niabomidana monawayaele-minoe. Edimosiya monokamuye liki dabuha moliki li mumusi amae, ito dabuha moliki li eha jiki suwamabolawa ele-minoe. Eha jeko minatune liki maya eha jikigo minatanako. <sup>16</sup>Edimo ulawatipouya amanama ma mumusi oneyoko minabo nenako, nepauti omu wilekoyoko limikilae. <sup>17</sup>Edimoya edimotipomuya sa-liki likaka niae: Lemote lukamidana uvaminala waitoko ne. Lemoya nenahamu ohu jekaka noune. Saina maina moludawo nesamuya mako ohu jamune likakiwa

<sup>w</sup> 3:9 Aes 49:23; Aes 60:14    <sup>x</sup> 3:12 Lev 21:2; Aes 62:2; Aes 65:15

niaboya, edimo elewole amabomidana monawatipo mudamadanaki you labo ohuda wewena domuda likonebolitaya dupa sapago minikaka niae. Sa-ikaka niaboya, yakiya edimo eli wehe liki elamae.<sup>18</sup> Yamuya data leko lo noliboyo, elilo. Edimoya nemotokati goli ehada pana-pana keko nebo meinawa yoweko nebo maya meina hikadeko, uvaminatipo laloki wewena minatae. Ito dupalo nesa ukulogo meina hiki li olo jikiki dupa sapago netibomidana owana maya li hititatae. Ito domudamidana netupala maya meina hikiki domudaloya hilikadeko pana-pana kitiye.<sup>19</sup> Nemoya nuka bekaka nobo wewenasidaya dilipe oijolo moloko dilipe wehe lokaka noe. Sa-okaka nobo neyo, edimoya dabuha moliki duka li wili jilo.<sup>20</sup> Eli-minahe. Nemoya ateda emesaloka yeimaya minoko hoko-hoko lokaka noe. Sa-okaka nonako, wewena makolimo onone elekoko maya anuya siyenetadeco, numudalau yowekoloe. Sakoya yoweko nodenesa lalo maya nokomekoko emoki nemokiya magoina minakoloiye.<sup>21</sup> Nemoya nabuha moloko Olohamidana maya asetokodanaki ahonekaho onowelaki siyalo minokaka noiboto minokaka noe. Wewena mako monokau dabuha moliki miniki Olohamidana asitataboya asaikiya nemoki lesa molokoyoko, onowelaki siyalo magoina namaitoka minakilae.<sup>22</sup> Omaimidaneweuna oluholimo Omaimidanewewenalalesida sa-loko lo nobiboya data golonetibowe wenalita eli wehe liki elilo.

### Okulumau Omaimidaneweuna epoka likaka niabo ga.

**4** <sup>1</sup>Nemokahoya saina sakoya mudakodanaki, nomuda hulo okulumaloka moloko okulumama ateda golotiyoko mudaue. Sakoya nomudaoyoko, ga mako ada ayauti soto piyoko eloboya, pikulikidana onowa jidanaki sa-loko lo nimkiye: Emoya maloka yoweko minadeco saina-maina soto pitiboya ilipekoyoko mudatane. <sup>2</sup>Loko nolibo epakiya Omaimidaneweuna oluholimoya nukane le wili jekaiyoko, okulumau onowelaki siya mako nebomidana mupilaloya we mako neyoko mudaue. <sup>3</sup>Ito onowelaki siyalo nebo weya okepa omudalaya meinawa yoweko nebo aweyaha ibo ehada uliwa jasipae loko nebo ehadamidana oko ito koniliyaniehada lahomidana maya pana-pana keko ne. Ito lolowalokaya huwepalalimoya ohugomidana le nugu nugu loko neyoko mudaue. <sup>4</sup>Ito onowenipoki siya malokaya 24-pala maya onowelaki siya napaya hiki wego ikadanaki minayoko mudaue. Ito yatoka siyasida mupinipoloya olopa we loidawa onowenipo ukulo nesago olo jikiki mini-liki wi-minayoko mudaue. Ito madonipoloya adakoli onowelaki golidunu lolo i-minabo olo jimi wi-minayoko mudaue. <sup>5</sup><sup>a</sup>Ito onowelaki siya napalotiya omelele oko pou loko onola napakiya ne. Ito onowelaki siyamidana

y 3:19 Hib 12:6 z 4:3 Iji 1:26-28 a 4:5 Lev 8:5; Lev 11:19; Lev 16:18; Lev 1:4

omudalokaya jo le 7-pala loko neboya Omaimidan abuha-wowola 7-pala nebo weuna oluhomidana lela maya ne.<sup>6</sup><sup>b</sup> <sup>c</sup>Ito onowelaki sipamidana omudalokaya galasi lalodunu lolo abo nesaya ela nokidana oko nedanaki, aha lameda gugu loko ne.

Ito onowelaki siya napamidana apila maloka maloka maya elewole nesa loweki loweki iki mini-liki wi-minae. Sa-iminaboya, aya nesahenasida domudanipoloka ito demesalokakiya domuda waitoko ne.<sup>7</sup> Makoya layioni okohimi ula elibo, ito makoya bulumaka kalewa elibo, ito makoya wewena okepa omuda molaibo, ito makoya nama luipamidana okanaki namaya ne.<sup>8</sup><sup>d</sup> Elewole nesa loweki loweki maya okananipo 6-pala ito muki okananipoloka domudanipo minokaiyoko, lubu jeko o loko iboya ai moliki sa-liki nama likaka niae:

We napa Omaiya abuha-wowola le suwoko lekaka we eto onebo  
weya hapa yeikala nebo we maya olotiyaki aha nebo we maya,  
aku ma mikaukaya nisekolaiye.

<sup>9</sup>Ito elewole nesa loweki lowekisiya onowelaki siya minokaka noiboto elewole oko minokaka aholada epoka liki elowa jiki uliwa li sawa jiki minayoko,<sup>10</sup> olopa we loidawa 24-pala maya onowelaki siya minokaka noibotoka maya elewole oko minokaka noibo aholada amaitoka miniki monoka liki uliwa li sawa jiki epoka ladanaki, siyamidana amaekuka onowelaki adakolinipoya ololotiki nimoladanaki sa-liki likaka niae:

<sup>11</sup> We napate Omailika emokahoya muki nesa le soto moladawo ito emoka akaloya muki nesahena soto pikiki minikaka niabo nenako, wewenalita onowelaki ulika ito abuha-wowoka li sawa jitaboto koheko minane.

### Omaimidana sipisipi jalalimo pepaya wasawaki liye.

**5** <sup>1</sup><sup>e</sup>Sa-okaiyoko onowelaki siyalo minokaka noibo welimoya ade lamawakaloka pepa wasawaki leneyoko mudaoe. Ito aya pepamidana omudaloka emesaloka maya luhuwa ji-minayoko mudaoboya, huma 7-loti moli omiki lolo i-minabo ne.<sup>2</sup> Okanaki we abuha-wowolaki neyoko mudaobo welimoya ga napauti sa-loko liye: Nakaha welimoya wehe lo-minoe loko maya pepamidana humala kawa sideko woko wehe letiye.<sup>3</sup> Loko liboya, wewena mako okulumauti ito maya mikaukati ito mika ulautiya aya pepamidana humala maya kawa sitabo nesa lamiye.<sup>4</sup> Sakoya aya pepa maya kawa setiboto we mako koheko nebo we minamiyoko nemo muluneu lahelamiyoko wije nama loe.<sup>5</sup><sup>f</sup> Sakoya wije nama noloyoko, we loidawa makolimoya wije amoko mudao. Juda wewenasida nalautiya okohimi ula layonikidana nebo we

<sup>b</sup> 4:6 Iji 1:22    <sup>c</sup> 4:6-7 Iji 1:5-10; Iji 10:14    <sup>d</sup> 4:8 Aes 6:2-3; Iji 1:18; Iji 10:12

<sup>e</sup> 5:1 Aes 29:11; Iji 2:9-10    <sup>f</sup> 5:5 Jen 49:9; Aes 11:1,10

soto pibo maya Dewitida awola nebo welimo Olohamidana asetokadanaki pepa huma 7-loti moli omiminabo maya kawa sekolaiye loko liye.

<sup>6</sup>Loko noliyoko, nemoya nomuda hulo moloko onowelaki siyalo elewole nesa loweki lowekiki ito olopa we loidawa luwanipou maya sipisipi ja akalewa makomamidana kohai moli-minayoko, alo helenebomidana mudaobo ne. Sipiyala 7-pala nebo ito omudala asako 7-pala neboya Omaimidanweuna oluhola abuha-wowola 7-pala nebo wemidanaya Omaimo oli hekaiyoko ma mikauka suwonebo weuna oluhomidana aweyahala ne. <sup>7</sup>Ito akalewalimoya woko onowelaki siyalo nebo wemamidana ade lamawakati maya woko wasawaki pepa maya liye. <sup>8</sup><sup>h</sup>Sakoya lekaiyoko elewole oko minokaka nesa loweki lowekima ito olopa we loidawa 24-palamasiya ja akalewamidana amaekuka maya lipi miki minae. Sa-ikadanaki, nama letiye liki nama likaka nesa napa maya li-minadanaki, lape makoya golidunu lolo abo lapekiya dadeuya makoko makoko iki li-minae. Nuwalaki paula Omaitoka jokila hi mikaka paula nuwala dowaloko wibo paulamidana maya aya lapeuma waitoneyoko monoka likaka niabo wewenasiya Omailoka likaka niabo nesamidana aweyahawa ne. <sup>9</sup><sup>i</sup>Sakiya nama ohatama makoya sa-liki lae:

Pepamidana humala kawa setadawoto maya koheko minane. Emoda kohaelikayoko heledanaki oladakadunuya muki numuto namato wewenasida aito aito donoki ito aito aito dupaki ito aito aito nalauti minabo wewenasida maya muki meina heko magoinaya dilipe Omailoka moladawo maya ne.

<sup>10</sup> <sup>j</sup>Ahote Omaida elekele itatae loko oholau maya emolatoka jokila hi mitabo we loko dilipe moladawo maya ne. Sadawo wewenasiya maya mikauka ujapa iki miniki ulinipokiya minakilae.

<sup>11</sup> <sup>k</sup>Sa-okaiyoko, aku nomuda hulo moloko mudaoboya muki okananipoki wewenasida depauti maya muki ga maya eloe. Aya okananipoki wewenasida nabaniro maya 100 miliyoni tauseniya minae. Edimoya onowelaki siyalo ito elewole nesa loweki loweki ito we loidawa minabotoka hi wego iki ga napa liki nama sa-liki lae:

<sup>12</sup> Akalewa maya omutiki kohai helebo welimoya abuha-wowolo ito uvamina ito ele wewesokaka nesa ito elewoley litibo ito muki wewenasi epoka liki emo uliwa li sawa jideko emo uliwaya yoweko netiboya koheko netibo ne liki lae.

<sup>13</sup> Nemoya muki okulumauka nebo nesa ito maya mikauka nebo nesa ito mika ulauka nebo nesa ito ela no ulauka minabo nesasikiya sa-liki nama nilayoko eloe:

Onowelaki siyalo nebo wemamidana ito akalewamidana epoka loko uliwa maya le sawa jekuniyoko, lameda lokaka ito

---

<sup>g</sup> 5:6 Aes 53:7; Jek 4:10    <sup>h</sup> 5:8 Sam 141:2    <sup>i</sup> 5:9 Sam 33:3; Sam 98:1    <sup>j</sup> 5:10 Eks 19:6;  
Lev 1:6    <sup>k</sup> 5:11 Den 7:10

elewoleya emotoka maya mino-loko woko mino luwatoka moloko minakolaiye.

<sup>14</sup>Liki likayoko elewole iki minikaka nesa loweki lowekimasi donoto liki yotokoe liki likayoko olopa we loidawamasiya di bola hi miki monoka liki uliwa li sawa je.

### Akalewamamo pepa luhuwa maya kawa siye.

**6** <sup>1</sup>Ito nomuda hulo moloko mudaobotokaya sipisipi ja akalewamamo pepa huma <sup>7</sup>-palautiya mako maya kawa siye. Sakoya kawa nosiyoko elewole oko minokaka nesa makolimo o alake libomidana niseko nemotoka maya sa-loko liye: Niso. <sup>2</sup>'Loko lokaiyoko mudaobo maya hosi ja ukulo mako nisiyoko, emesaloya we mako neboya imilaki ito onowelaki adakolila maya mikayoko lowa nesa maya hulo upalo okoko muki nesamidanaya asebetakolo leko wiye.

<sup>3</sup>Ito akalewamamo huma naba 2 maya leko kawa sokaiyoko elewole oko minokaka nesa naba 2 mamo enemane oko niso loko ju loko liye.

<sup>4</sup>"Loko liyoko hosi ja laho makoya soto pekoko niskiye. Sakoya nisiyoko mudaobo maya emesalo we mako neboya, aya welimoya ma mikauka wewenasida maya hulu le olowe obetokadeko emo kohakadeko emo kohakadeko itae loko elewoleya mibo we maya niskiye. Sa-iyoko lowa napa le soto molatibomidana elewoleya ito sopolo napa hana mako mekaiyoko adelauya lene.

<sup>5</sup>"Sa-okaiyoko pepa huma naba 3 maya kawa siyoko elewole oko minokaka nesa naba 3 mamoya niso loko ju liyoko nemo maya nomuda hulo moloko mudaoe. Sakoya nomudaoyoko hosi ja lubuha mako niskiye. Sakoya nisiyoko, aya jamidana emesalo nebo welimoya sigeli maya lene. <sup>6</sup>Sa-okaiyoko elewole oko minokaka nesasida luwawanipouti maya wewenasi donokidana soto peko sa-loko liyoko eloe: Muki nesasida meinawanipoya yoweko nenako laisia kapu <sup>4</sup>-pala waitiyokoya meinawa 5 kina, ito polisiya asako kapu <sup>4</sup>-pala waitiyoko meinawa ayamidana oko 5 kinaya neboya, oli wiye labo nesamidana nouvalaya ito waeniye labo nesamidana nouvalakiya li opa-napa amilo, uvaminanipoki wewenasiya nikaka niabo nesa maya neyo.

<sup>7</sup>Sa-okaiyoko sipisipi ja akalewamamo huma naba 4 maya kawa siyoko elewole oko minokaka nesa naba 4-mamoya niso loko ju liye. <sup>8</sup>'Loko liyoko mudaobo maya hosi ja mako upalo sihuga libo nisiyoko mudaoe. Sa-iyoko aya jamidana emesalo nebo wemidana uliwa maya helekaka nesae loko ne. Ito emesalo nisibo wemidana uliwaya meiku hilekaka nesae loko ne. Ito mikauka wewena laka loweki loweki minabototi laka maloka maya lowa hekaka nesalimo ito nodekumu helikaka nesalimo

<sup>1</sup> **6:2** Jek 1:8; Jek 6:3,6   <sup>m</sup> **6:4** Jek 1:8; Jek 6:2   <sup>n</sup> **6:5** Jek 6:2,6   <sup>o</sup> **6:8** Iji 14:21

lahelamibo nesamidana muki wewenasitoka soto pitibo nesalimo ito liwe lawe nesasi nisiki muki wewenasida kohaidiki helitabomidana abuhawowola maya biyoko li-minaiye.

<sup>9</sup>Ito akalewamamo huma naba 5 maya le kawa siyoko mudaoboya, maloka wewenasiya Omaimidan gala maya li-miniki li hutili iki maloka wewenasida li bebomuye liki kohaidiki heleboya, weunipo maya Omaimidan jokila hi mikaka namabetamidana iwauka minayoko mudaoe. <sup>10</sup>Sa-okaiyoko aya wewenasiya ga napauti sa-liki lae: Eto oko minadawo We napalika onawaka maya le hana okane. Lemoda wewenasi kohalelaboto maya nena yupekama pasetadawo ne. <sup>11</sup>Liki layoko ukulo lawo-lawo makoko makoko oko beko suwokoko sa-loko lo biye: Elekele oluho monoka wewenatipole maloka mudalo, yamidana iki kohaidiki helitaboya edimo nabatipo maya waitetibotoya ne. Sa-etibo neyo, edimoya onawa lasolasi mako ujapa i-minalo.

<sup>12</sup><sup>p</sup>Loko lokaiyoko makoya sakoya mudaoe: Sipisipi ja akalewamamoya pepa huma naba 6 maya kawa siyoko mima napa-napa iye. Sa-iyoko ho maya lubuha onupapa vokoko ukada maya olada noviyoko mudaoe. <sup>13</sup><sup>q</sup>Ito sonohi maya juju ihilawakidana halatoko hunu molaibo lasilimo noliyoko ululutoko lemo jibomidana oko okulumaloti maya olulutiki limi nijeyoko mudaoe. <sup>14</sup><sup>r</sup>Sa-okaiyoko okulumaya usi pepa likebomidana oko eleweke loko woko leso iye. Ito muki bolahena ito mika ovalahena maya omutiki minabo ebanipohena maya hulikiki li aitoka wiwi ae. <sup>15</sup><sup>s</sup>Sakoya sa-noiyoko maya mikauka ujapa wewenahena ito lowa hikaka welo ujapa we ito uvaminanipoki wewena ito duliki wewena ito abuhawowonipoki wewena ito ehada lamabo yowanu lebo wewena ito moletiki minabo wewenakiya muki wiki ehada numuku bolauka aleuka halukiki minabo ne. <sup>16</sup><sup>t</sup>Sakiya minadanaki ehadahena ito bolahenasida maya ju liki sa-liki lae: Limiki mijilitamae. Lemoya sipisipi ja akalewamamo mesaha jeletokatiyo ito onowelaki siyalo nebo wemidana owisalalo wamekoluniyo, limiki hitilitalo. <sup>17</sup><sup>u</sup>Mesaha jitabo onawa napa maya depauka lalo lamibo nesa lolo udawomaki leko nisitibo maya nenako, ekahiliya maya elewole oko owisalalo sinatadawo ne, lemoya mate sinam ekoluninako.

#### Omaimidan anelaya Isilaelo wewena 44 tausenisida dotipanipolo ne.

**7** <sup>1</sup><sup>v</sup>Sa-okaiyoko mudaobotokaya okananipoki we loweki loweki maya mika lolowa loweki lowekilo maya liminayoko mudaoe. Sakiya maya mikauya lasi loweki lowekilo li-minabo wesiya mikauka ito ela nokuka ito mika mupilaloka maya lasi okatiye liki li pilikiki li-minae. <sup>2</sup>Sa-

<sup>p</sup> 6:12 Lev 11:13; Joe 2:10,31   <sup>q</sup> 6:13-14 Aes 34:4   <sup>r</sup> 6:14 Lev 16:20   <sup>s</sup> 6:15 Aes 2:19-21

<sup>t</sup> 6:16 Hos 10:8; Luk 23:30   <sup>u</sup> 6:17 Joe 2:11; Mal 3:2   <sup>v</sup> 7:1 Jel 49:36; Den 7:2

okaiyoko mudaobo maya ho noywibotoka maya okanaki we makolimo elewole oko minokaka Omaimidana anela maya leneyoko mudaoe. Sa- okaiyoko aya wemamo okananipoki we loweki loweki maya mikahena ito ela nohena le opa-napa itabo abuha-wowo liminabosida maya sa-loko lo biye: <sup>3</sup> "Edimosiya enemane iki ma mikauka nesa ela nokuka nesa ito jahenamaki li opa amilo. Lemoya omutoko Omaimidana wewenalale yuhasida otipanipolo maya ane molobetokunyoko neyo. <sup>4</sup> Loko lokaiyoko wewena otipanipolo Omaimidana anela neyoko mudaobo wewenaya Isilaelo wewenasida nalauti 144 tauseniya Omaimidana anela otipanipolo nebo nenako, <sup>5</sup> aya wewenaya Judada nalalautiya 12 tauseni minae, ito Lubenida nalalautiya 12 tauseni minae, ito Gadida nalalauti 12 tauseni minae, <sup>6</sup> ito Aseda nalalauti asaiki 12 tauseni minae, ito Natalaeda nalalauti asaiki 12 tauseni minae, ito Manasada nalalauti 12 tauseni minae, <sup>7</sup> ito Simiyonida nalalauti asaiki 12 tauseni minae, ito Liwaeda nalalauti asaiki 12 tauseni minae, ito Isakaloda nalalauti 12 tauseniya minae, <sup>8</sup> Sebulonida nalalauti 12 tauseniya minae, ito Josepuda nalalauti 12 tauseniya minae, ito Benisamenida nalalauti 12 tauseniya minaboya, muki duli duli lobo wewenasida awonipoloya Omaimidana anela dotipanipolo nebo wewenagoya minae.

### Aito aito mikalokati wewena nala napa minabo.

<sup>9</sup>Sa-okaiyoko muda maloka moloboya muki numuto namato wewena aito aito dupaki ito aito aito donoki ito aito aito nalautikiya muki wewenaya wavu-liki wewena makolimo lepeko suwametibo nesa liki minabo wewena maya onowelaki siyamidana owisalo maya sipisipi jamamidana amaitoka minayoko mudaoe. Aya wewenasiya dupalo nesa ukulogo olo jikiki Omaimidana epoka likili dadeu maya kokonasi ailawa hukiki li-minae. <sup>10</sup>Sakiya mini nupa iki miniki ga napauti sa-liki lae: Omaite maya onowelaki siyalo nebo ito sipisipi ja akalewa nebo edimotokatiya olisauti lilimekaka noibo nesaya soto pekaka noiye. <sup>11</sup>Sa- ikayoko okananipoki we muki ito olopa we loidawaki ito elewole oko minokaka noibo nesa loweki lowekimasiya onowelaki siya maya hiki wego ikiki aya siyamidana amaitoka dokepa hi-minadanaki Omaimidana uliwa li sawa jiki sa-liki lae: <sup>12</sup>Yotokoe. Omaitemidana upauka maya lahelepa adoha noiye. Maku bekaka ito emo luhuwaka lepekaka ito ele wewesokaka epoka loko uliwa le sawa jekaka ito abuha-wowo maya Omaitoka nebo maya eimolatokago mino luwato moloko minakolaiye. Yotokoe.

<sup>13</sup>Liki li nihulayoko olopa we loidawa makolimoya loka onetoko sa-loko liye: Dupalo nesa hana-pana ukulo nesago olo jebo wewenaya ekahile

w 7:3 Iji 9:4,6

ma minae. <sup>14</sup><sup>x</sup>Loko liyoko, onoto leko sa-loko loe: Uliki welika nemo elamoyo, emoya ele-minatadawo maya neyo, lo nemowo. Loko loyoko, sa-loko nonoto leko liye: Yatoka wewenaya dupa miluma niki delonipo wibo nesa maya ulanipolo wewenasi lolo ibitabotoya dupalo olisa soto pamiyoko minae. Sabo wewena maya sipisipi ja akalewamamidana oladaloti maya nokalawe iki li uliwitikiki minae. <sup>15</sup>Sabo maya nenako, aya wewena maya onowelaki siyaloya Omailimana amaitoka miniki ludaka nekewa monoka numuda napau maya elekele itiki minikaka niae. Sa-iki minikaka niayoko onowelaki siyaloya minokaka noibo wemamo ujapa obetoko minakolaiye. <sup>16</sup><sup>y</sup>Sa-ideko nodemu nomuya delametibo ne. Hoya lamideko saina makolimo dupalo kolametibo ne. <sup>17</sup><sup>z</sup>Sa-iki minowa minowa okakamidana no hihuwaloka dilipe-loko wekolaiye. Sa-okadeko Omailimo letiboto domuda nouwala maya sepo jeko suwekolaiye loko lo nimiye.

### Pepa huma naba 7 maya kawa siye.

**8** <sup>1</sup>Sa-okaiyoko Sipisipi ja akalewamamo pepa huma naba 7 maya kawa sibo maya okulumauka nesahenasiya dononipo jamayoko, hapu aowaya wiye. <sup>2</sup>Sa-okaiyoko yaloti maya okananipoki wewena 7-pala maya Omailimana amaitoka sini minikaka abo wesida mudaidoboya pikuli maya dadeu makoko makoko iki liminayoko mudaoe. <sup>3</sup><sup>a</sup>Sa-ikayoko yaloti maya mudaoboya, okanaki we makolimoya nuwalaki paula goliloti lolo abo maya lapelau kisiboya le-loko nisiye. Sa-iboya Omailimana jokila hi mikaka namabetaloka maya sinoneyoko, nuwala wokaka noibo paula muki maya mikayoko, onowelaki siyamidana okepaloka maya Omailimana jokila hi mikaka namabeta maya goliloti lolo abo nesamidana mupilalo maya jekaiyoko, monoka elebo wewenasiya Omailoka likaka niabo nesalo maya niseko okepa hiye. <sup>4</sup>Sa-okaiyoko okanaki wemamidana adelauti maya nuwala wibo paulamidana jokilaya monoka elebo wewenasiya Omailoka likaka niabo nesalo maya niseko okepa hiyoko, Omailoka maya yowiye. <sup>5</sup><sup>b</sup>Okanaki wemamo nuwalaki jokila jikaka niabo lape maya lekoko namabeta napa makoya asaiki oliminaboto maya Omailoka jokila hi mikaka niaboto jo uluma oko libolawa maya leko woko lapeu maya jeko waitokoko mikaloya hulo molaiye. Sakoya leko woko hulaiyoko o alake napa-napa nolidanaki mima napa-napa iye.

### Okananipoki we 7-palasi pikuli 7-pala huhu lae.

<sup>6</sup>Sa-okaiyoko okananipoki we 7-palasiya pikuli 7-pala li-minabo maya huhu likili li lolowa ae.

<sup>x</sup> 7:14 Den 12:1; Mat 24:21; Mak 13:19   <sup>y</sup> 7:16 Aes 49:10   <sup>z</sup> 7:17 Sam 23:1-2; Aes 25:8

<sup>a</sup> 8:3 Eks 30:1-3   <sup>b</sup> 8:5 Liv 16:12; Eks 19:16; Lev 11:19; Lev 16:18

<sup>7</sup><sup>c</sup>Sakiya li lolowa ikayoko okanaki we makolimoya eimola pikulila maya huhu liyoko, omoimaki ito jomaki ito oladamaki li opa abolimo leko mikalo maya limiye. Sa-ikayoko maya mikau laka maya potoko le loweki makoki iyoko, laka makomau maya opatamibo yahena maya jolimo liye. Ito makomau maya ohuhena maya jolimo loko suwiye.

<sup>8</sup>Sa-okaiyoko naba 2 okanaki wemamo pikulila maya huhu liyoko bolakidana nesahena maya jo epa ulumalimogo okoko ela noku limiye. Sakoya ela noku limiyoko ela no maya potoko le loweki makoki iyoko makomau maya oladalimogo iye. <sup>9</sup>Sa-okaiyoko ela noku minabo nesahena maya asako potoko le loweki makoki iyoko makomau minabo nesahena maya heliki suwayoko, noku lapehena maya jewo potowo iye.

<sup>10</sup><sup>d</sup>Ito okanaki we naba 3 mamo pikulila maya huhu liyoko okulumalotiya sonohi napa maya lemo jiboya leyamidana oko uluma oko lemo no makomau jiye. <sup>11</sup><sup>e</sup>Aya sonohimidana uliwa maya ekesalakiye loko ne. Sa-okaiyoko no maya potoko loweki makoki iboku makomau maya lemo jeneyoko aya no hiki nabo wewena maya ekesamu heliki suwae.

<sup>12</sup><sup>f</sup>Sakiya heliki suwayoko okanaki we naba 4 mamo pikulila maya huhu lokaiyoko homa ito ukada ito sonohimaki lamedanipo maya potoko le loweki makoki okaiyoko, makomidana lamedala maya suwiye. Sa-okaiyoko maloka maya suwa nesa leko o maya liye. Sa-okaiyoko luwato maya ayamidana oko sonohihena ito ukadahena maya suwa lameda lae.

<sup>13</sup>Sa-okaiyoko nomuda hulo moloko nama luipakidana mako mudaoe. Sako mudaoboya aya nama maya yokawaloka yoweko minoko okana jeko ga napauti sa-loko ju loko liye: Agae, agae, okananipoki we loweki makokisida pikulinipo maya aha li-minae. Ya wesiya pikuli huhu litabo onawaloya maya mikau wewenaya nenahanipo itabo ne loko liyoko eloe.

**9** <sup>1</sup>Ito okanaki we naba 5 mamo pikulila maya huhu liyoko okanaki we mako upaloka sonohikidana lameda libo weya okulumaloti maya mikauka nolimiyoko mudaoe. Aya wemidana maya lomidana anu viminabo maya siyitiye liki kiwa maya mikayoko leko limiye. <sup>2</sup><sup>g</sup>Sa-okaiyoko, lemeko lomidana anuwa maya sijiyoko jokila adoha yowiye. Odupa jo jeniyoko jokila yowibomidana oko jokila yowiye. Sakoya aya jokilalimoya yoweko hoki ito lasihena omudanipolo maya jeko hitaiye. <sup>3</sup><sup>h</sup>Sakoya jeko nohitaiyoko ayauti hituhena maya ma mikaukaya leme. Saboya depanipoya amuke depa molone. <sup>4</sup><sup>i</sup>Sakiya limiki maya mikauka yanala ohunahusida ailawanipohena maya wau lamitae loko lo hukobetaiye. Omaimidana anela otipanipolo minamibo wewenasida maya lowa hi bitae loko lobetaiye. <sup>5</sup>Sakiya lowa hiki kohaidadeko

<sup>c</sup> 8:7 Eks 9:23-25; Iji 38:22   <sup>d</sup> 8:10 Aes 14:12   <sup>e</sup> 8:11 Jel 9:15   <sup>f</sup> 8:12 Aes 13:10; Iji 32:7; Joe 2:10; Joe 3:15   <sup>g</sup> 9:2 Jen 19:28   <sup>h</sup> 9:3 Eks 10:12-15   <sup>i</sup> 9:4 Iji 9:4

helitae loko lamiye, aha ukada 5-pala miniki kohibitadeko miluma-aluma elitae loko lobetaiye. Amukelimohe ito lokihalimo koheletaiyoko miluma eludawomidana elitae loko lobetaiye. <sup>6</sup><sup>j</sup>Sa-etibo nenako aya onawalo minatabo wewenasiya sa-etibo nesamuya heletune liki helitabo anuwamuya ohu jitaha, minamideko edimonipo ahamu ma helamitabo ne.

<sup>7</sup><sup>k</sup>Ito maya lobo hitusiya lowa wewenasiya lowalo wikili hosi jasida li lolowa abo nesa liki aya hitusiya makoko aweyaha iki minanako, madonipolo maya goliloti lolo abo adakolikidana iki li-minae. Ito otipanipohenaya wewena lokepa lomudakidana, <sup>8</sup><sup>l</sup>ito yopanipoya hana-pana laho menakipasida yopanipokidanaya, ito depanipo maya laiyoni okohimi okaka noibo liwe ulakidana, <sup>9</sup><sup>m</sup>ito ikinipoloka maya dupalo nesa ainiloti lolo abo neyoko mudaoe. Ito okananipoukati onowa liboya hosi jasi lowalo wikili kalikidana elibo nesa maya demesaloka molikiki ika iki liki wayoko onowa libomidana liye. <sup>10</sup><sup>n</sup>Ito aisawanipoya amuke aisawanipokidana oko minoko nekawanipo maya aisawanipouka maya ne. Sa-oneyoko nekawanipoya ukada lade maloka suwoko ukatoya, Omaimida anela otipanipolo minametibo wewenasida maya kohabitadeko, delogo wowa wowa oko netiye. <sup>11</sup><sup>i</sup>Ito okanaki we mako lokumidana anu siyekaka noibo weya uliwa Hibulu wewenasida ganipouti maya Abadoni, ito Guliki wewenasida ganipouti maya Apoliyon, ito lemo ateuti maya wau lekaka we loko ne.

<sup>12</sup><sup>Agae</sup>, edawaki miluma nesa mako aloya suwokainako, lowe maya aha neboyae loko liye.

<sup>13</sup><sup>n</sup>Sa-okaiyoko okanaki we naba 6 mamo pikulila maya huhu liyoko Omaimitoka jokila hi mikaka jama namabeta goliloti lolo abo Omaimida okepalu nebo nesamidana sipiwala loweki loweki neboluti we makomidana onola mako yowidanaki, <sup>14</sup><sup>okanaki</sup> we naba 6 pikuli huhu libo wemidana sa-loko lo miye: Yupeleti no napalo okananipoki we loweki loweki nalalo minabosida olutobetadeko wideyo. <sup>15</sup><sup>Loko</sup> lokaiyoko okananipoki we loweki lowekimasiya aya melekelo aya ukadalo aya onawalo ito aya aowalo maya ma mikau wewena maya potiki li loweki makoki iki minadeko, wewena nala makosida kohaidi esa ikili dewa iki minabosida maya olutobetaiye. <sup>16</sup><sup>Ito</sup> imiki we hosi ja demesalo minabo wesida nabaniyopa 200 miliyonie liki layoko eloe. <sup>17</sup><sup>Wewenaki</sup> hosi jakiya sakiya niseyoko iha hukoko mudaoboya ikinipoloka dupalo nesanipoya siyotinipoya ainiloti lolo abo nesa maya sihugahena ito lubuhahena ito lahohena ija jiki minayoko mudaidoe. Ito hosi janipolesida madonipohena maya laiyoni okohimi ulakidana neyoko mudaidoboya, depauti maya joki jokilaki ito ehada mako sihuga libo ehadaya upaloka

<sup>j</sup> 9:6 Job 3:21; Jel 8:3    <sup>k</sup> 9:7 Joe 2:4    <sup>l</sup> 9:8 Joe 1:6    <sup>m</sup> 9:9 Joe 2:5    <sup>n</sup> 9:13 Eks 30:1-3

maya jo noliyoko limiye.<sup>18</sup> Hosi jasida depalotiya joki jokilaki ito sihuga ehada maya jo noliyoko limibo ehadalimoya, ma mikau wewenasida maya he potoko le loweki makoki noiyoko, wewena nala makosida maya kohaidi suwae.<sup>19</sup> Sa-iboya aya hosi jasida elewoleyaniipoya depaloka ito aisawanipoloka maya ne. Aisawanipoya oleteha madonipokidana minomo winako, yalotiya wewenasida maya miluma nesa lolo ibitim wae.

<sup>20</sup> °Ito muki wewenasitoka lowa-lawa nesalimo maloka wewenasida maya kohaidoko helemo nowideko, malokasida maya esenipo vobetaibolawaya lahelibo lahelamibo weunipo li wili jiki minamadanaki aya nesaki apusa jiki li-minab ne. Sa-ikiki suwa omai goliloti siluwalot iehadaloti yaloti lolo iki abohenaki mudaki elikaka iki minamibolawa ito anu moloko monekaka amibo nesamidana di bola hi miki monoka likaka niae.<sup>21</sup> Sa-iki minadanaki wewena kohaidi helikaka nesaki iheda nalisa jiki ito we olisa mena olisa ito ukele-hakele iki sa-ikaka abo nesahena maya hulamabo wewenamae.

**Okanaki we makolimo pepa wasa eleweki-  
minabokuti maya kawa nosiye.**

**10** <sup>1</sup>Ito okulumauti okanaki we mako limiboya elewoleyalaki we madonalo huwepalalimo gogona oko minoko upaloya limukidana nesa wego oko neboya, ayaloti lameda loko pana-pana keko ne. Sakoya okepaloya ho silihilakidana ito ila maloka malokaya ahodakidana neboya ayaloti jo ulumakidana oko uluma uluma oko ne.<sup>2</sup> Sakoya nolimidananaki adelau maya pepa lasola mako leneboya alo-talonebo ne. Sa-noiyoko ila atahakalokati maya ela no mupilalo maya jeko ito ila lamawaka maya mikalo jeko neyoko mudaoe.<sup>3</sup> Sakoya nedanaki laiyoni liwe ulalimo onowa lokaka noibo nesa leko ga napauti liyoko o alake 7-palasiya dononipo lae.<sup>4</sup> Sakiya dononipo mako layoko aya ganipo maya luhuwa jekolo noyoko, okulumauti we makomidana onola sa-loko soto nopyoko eloe: O alake 7-palasi labo ga maya luhuwa je molamoko aha ulawakau yaitaya minadeyo.<sup>5</sup> <sup>5</sup>Loko lokaiyoko okanaki we mako ila maloka mikalo jeko ito maloka ela no mupilalo jibo wemamo adela lamawakalokati okulumama le sawa jiye.<sup>6</sup> Sakoya le sinokaiyoko elewole oko mino-loko wekolaibo wemamo okulumaloka mikaloka ito ela nohenauka sainahena lolo oko suwibo wemidana ulilalo maya sa-loko lo hukaiye: Onawa mako ewa oko minamekolune.<sup>7</sup> Okanaki we naba 7-mamo pikulila maya huhu lokadeko onawa napa mako molakolaiye. Sa-etibo yupeka maya Omaimidana gala suna ibo maya Omaimidana epaloti ga likaka we Omaimidana elekele itiki minab wewenasida yeimaya wehe loko lo bibomidana ihilawa maya soto peko suwetibo ne.

◦ 9:20 Sam 115:4-7; Sam 135:15-17; Den 5:23    P 10:5-6 Dut 32:40; Den 12:7

<sup>8</sup> <sup>q</sup>Loko liyoko omutoko okulumauti onowa mako elobomidana oko  
aku soto pekadanaki sa-loko lo nimiye: Emoya woko okanaki we  
mako ela nolo ito mikalo mijeko lenebo wemamidana adelautiya pepa  
mako le elewekeko lenebo maya lo. <sup>9</sup> Loko lokaiyoko nemo maya woko  
okanaki wema neboto maya pepa lasola lenebo maya nimitiye loko  
loyoko aya wemamo sa-loko lo nimiye: Lekoko no. Sakoya le epakaloka  
molatadawoya lube nouvalakidana lahelepa ekolaiye. Sa-etiboya  
nokadeko ohumakauka lemekadeko, ekesa ekolaiye. <sup>10</sup> Loko lokadanaki  
nimiyoko nobo maya nepalo maya lube nouvalakidana lahelepa iyoko  
noko mikili obo maya nohumaneuka maya lemeko ekesa adoha iye. <sup>11</sup> Sa-  
okaiyoko emoya muki numuto namato wewena aito aito dupaki ito aito  
aito donoki ito muki duliki wesidamuya ohuwa hukoko lo, loko lo nimiye.

### Omaimidana gala li soto molikaka we lowesida ganipo.

**11** <sup>1</sup> Ito makomalimoya molo elekaka oijo akusakidana makoya  
nemekadanaki, sa-loko lo nimiye: Emoya sinokoko Omaimidana  
monoka numudala napaki ito jokila hi mikaka namabeta napalokiya molo  
eleko Omailoka monoka likaka niabo wewenakiya lepo. <sup>2</sup> <sup>s</sup>Ito hetokaya  
lemekoko numudamidana ebala maya mudamoko huliko, hetoka  
wewenasidamuye loko heko hukobetonebo nenako. Hetoka wewenasiya  
eto onebo ebane Jelusalemuga maya ukada 42-midana ulauya mijiki  
liliika jiminatabo neyo. <sup>3</sup> Sa-ikadeko nemo ane maya li bikaka we lowesida  
maya lo bekoyoko dupalo nesa asehawa li kolikiki li bibi iki minadeko,  
ukada 42-palaya niseko wekolaiye.

<sup>4</sup> <sup>t</sup>Ito oliwi ya lowe ito lamu jo loweya ma mikauka We napamidana  
okepaloka minaibomidana asaikiya minaiye. <sup>5</sup> We mako ekahimamo  
aya we lowesida ulanipolo we lolo obetokoko kohaidatuwe loko lalahu  
obetadeko maya depaukatiya jolimo lemeko lekolaiye. Sakoya wewena  
makolimo sa-etiboya eimolaya okepa usekolaiye. <sup>6</sup> <sup>u</sup>Ohenalo ujapa  
isaibo elewoleya benebo maya neyo, Omaimidana gala maya li biki  
minadeko, ohena maya jametiye. Omidana maya ilime olada lolo ikilaiye.  
Sa-isaiboya Omailimo elewoleya benebo nenako, sa-ikilaiye. Ito maya  
mikauka wewenasida dupalo lowa-lawa nesa soto pitiye liki lisaiboya  
aha soto pitibo ne. <sup>7</sup> <sup>v</sup>Ito monoka lisaibo onawa maya alo suwokadeko  
lokugutiya okohimi etibo lahelametibo nesa maya usekolaiye. Sakoya  
aya nesalimoya aya we lowesida kohaidadeko helikilaiye. <sup>8</sup> Sakiya  
helikadeko wewenasiya onowaniposida hulikadeko eba napamidana  
anuloya minakilaiye. We napanipo maya yeimalo aya ebaloya yoho  
yaha yalo maya kohaikayoko helene. Aya ebamidana uliwaya koha

<sup>q</sup> 10:8-10 Iji 2:8-3:3    <sup>r</sup> 11:1 Iji 40:3; Jek 2:1-2    <sup>s</sup> 11:2 Luk 21:24    <sup>t</sup> 11:4 Jek 4:3,11-14

<sup>u</sup> 11:6 Eks 7:17-19; 1 Sam 4:8    <sup>v</sup> 11:7 Den 7:7,21; Lev 13:5-7; Lev 17:8

moloko gaukatiya Ijipiye liki likaka niae. <sup>9</sup>Sa-okadeko numuto namato wewena aito aito donoki ito aito aito dupaki ito aito aito nalautikiya onowaniposida maya onawa loweki makoki ito hapuwaki mudaidiki minakilae. Sa-itaboya malokasiya ale jetune liki litaboya, malokasiya eli bamikilae. <sup>10</sup>Ito aya monoka likaka niabo we lowesiya muki wewenasida miluma nesa napa-napa bikaka aibo nenako, heleibokumuye liki elowa jiki uvamina li yolalo malo ikilae. <sup>11</sup><sup>w</sup>Ito onawa loweki makoki ito hapuwaki oko wokadeko Omailokatiya ohatama oko minokaka nesa le soto molokaka weuna oluhomoya onowanipouya lemekadeko topa iki sinakilaiye. Sinadeko muki mudaidatabo wewenaya domoda wekolaiye. <sup>12</sup>Sa-okadeko okulumauti ga napa mako sa-loko limitiye: Ke, maloka yowilo. Loko lideko ulanipolo wewenasida domudaloya limu mupilalo maya yowikilaiye. <sup>13</sup><sup>x</sup>Sakiya niyowideko mima napa mako oko aya numudaloya malokawa maya lahelamiyoko, eba 9-palaya aha minakolaiye. Sa-etiboya aya mimalimoya wewena 7 tauseniya kohaidadeko, heliki esa ikilae. Sa-okadeko aha domuda li-minatabolawasiya domodanipo wokadeko Omai okulumamidana aholada uliwa maya li sawa jideko uliwa maya napa oko minakolaiye.

<sup>14</sup>Agae, edawaki nesa lowe maya alo soto pekainako, makoko maya asako aloya soto pekolo alili noiye.

### Pikuli naba 7-maya huhu liye.

<sup>15</sup><sup>y</sup>Sa-okaiyoko okanaki we naba 7-mamo pikuli maya huhu liyoko, okulumau maya ga napa liki sa-liki lae: Olotiya numuto namato duliki we minikakamidana elewoleya maya We napatemidana ito olisauti lilimitiye loko lo mololetaibo wemidana adelau maya neyoko, emokahoya ujapa obetoko uliki wenipo mino-loko woko minakolaiye. <sup>16</sup>Liki likayoko olopa we loidawa 24-pala Omaimidana omudaloka onowelaki siyalo minabo wemasiya di bola hiki Omaimidana li miki sa-liki lae:

<sup>17</sup>We napate Omailika emokahoya ode amode nesa lolo noadawo we emo minadawo ito oloti minane. Emoya elewoleyaka maya le nupa okadanaki muki nesalo ujapa obetokaka yowanu maya api oko noledawomu lemoya emodamu epoka adoha lokaka noune.

<sup>18</sup><sup>z</sup>Sa-noaniyoko nenako, muki numuto namato wewenasida depauka lahelamiye. Sa-niayoko emokaho mesaha jebetadawo onawa maya alili okaiyoko helebo wewenasida lihimanipomu obi yowanu lebetatadawo onawa maya soto piye. Sa-okaiyoko emo elekele oluhoka epakaloti ga likaka we ito monoka wewena ito emo elewoleyakamidana eli miki minabo wewena limiki yowiki iki

<sup>w</sup> 11:11 Jji 37:10    <sup>x</sup> 11:13 Lev 6:12; Lev 16:18    <sup>y</sup> 11:15 Eks 15:18; Den 2:44; Den 7:14

<sup>z</sup> 11:18 Sam 115:13

minabosida meinawanipo bitadawo onawa alili okaiye. Ito maya mikauka saina-maina li opa ikaka niabo wewenasida dilipe tolowa etadawo onawa mayaki aloya alili okaiye.

<sup>19</sup> <sup>a</sup>Liki epoka likayoko okulumaloka Omaimidan a monoka numudala napa maya golotokaiyoko, Omaimo lo mutihibo gamidana bokisiwa maya monoka numuda napau maya soto piye. Sa-iyoko ayahasilo maya o maya wesama noko onowa napa maya noloko alake noloko ito mima noko ito omoi maya napamidana hulakolaiye.

**Mena makoki ito oleteha napa makoki ganipo.**

**12** <sup>1</sup>Sa-okaiyoko okulumalo maya ane napa makoya sako soto piye: Mena makoya ho silihila maya upalo molone. Ito i lukanauka ukada molitikayoko ne. Ito madonaloka maya adakolilaya sonohi 12-palaloti lolo itabo adakolila olo jenebo ne. <sup>2</sup>Sa-iboya aya menaya oluho ohumanaki minokoko oluhola etakolo leha jeko opa-napa ga loko ne. <sup>3</sup><sup>b</sup>Sakoya neyoko, okulumaloya ane mako sako soto piye: Adoha oleteha napa-napa mako neboa, upalaya laho lone, ito madonaya 7-pala ne, ito sipiwala maya 10-pala minoko aya oletehamidana madona neboto nebotoya duliki wesi olo jikaka niabo adakolikidana olo jebetomo wonebo ne. <sup>4</sup><sup>c</sup>Sa-onebo oletehalimoya okulumaloka yoweko minoko aisawaloti sonohi maya heko potoko loweki makoki okoko le hula hula iyoko maloka maya ma mikauka leme. Sa-okoko aya oletehamamo aya mena maya oluhola etokadeko mikili etuwe loko woko amaitoka maya minoko ujapa one. <sup>5</sup><sup>d</sup>Sakoya aya menamamo oluhola etatibo oluholimoya muki numuto namato wewenasida maya aini akusadunuya ujapa obetatiye loko lo moloetaiye. Sakoya lokaiyoko aya oluho maya etaiyoko hipo ikadanaki liki yowiki Omaimidan amaitoka maya oliwaki siyalu maya hulitae. <sup>6</sup>Sa-ikaiyoko dola maya oli woko ame mikalokaya ukada 42 yamidana ulaukaya nasahili itadeko minatiye loko Omailimo le lolowa oetaibo ebatakaya woko ne.

<sup>7</sup><sup>e</sup>Sa-iyoko okulumaloka maya lowa napa soto piye. Okananipoki wesida ujapa wenipo Maekolo maya unalale yuhakiya adoha oleteha napamidana maya lowa heko kohatune likadanaki li lolowa ae. Sayoko adoha oleteha maya asaikiya unalale yuhakiya ile imi iki li lolowa ae. <sup>8</sup>Sa-ikaboya oletehasiya elewole iki lowa hiki asibitatabo nesa maya minamiyoko, okulumautiya doli hikadanaki anu vibilitae. <sup>9</sup><sup>f</sup>Sa-ikayoko, adoha oleteha maya hapa yeikamaukati nebo we Oloha maya muki wewenasida moneko dokepa jekaka noibo wemidana maya ipisiki hulikayoko maya mikauya limiye. Sakiya unala ipalale yuhakiya muki dipisiki hulikae.

---

<sup>a</sup> **11:19** Lev 8:5; Lev 16:18; Lev 16:21    <sup>b</sup> **12:3** Den 7:7    <sup>c</sup> **12:4** Den 8:10    <sup>d</sup> **12:5** Aes 66:7;  
Sam 2:9    <sup>e</sup> **12:7** Jud 9    <sup>f</sup> **12:9** Jen 3:1; Luk 10:18

<sup>10</sup> <sup>g</sup>Sa-okaiyoko okulumalo maya ga napa mako sa-loko soto piyoko eloe: Wewenatelesida olisanipomuya muki yupeka Omaimidana owisalalo maya obi obetoika obetoika ibo wemidana maya okulumaloti ipisiki hulikayoko maya mikauka maya lemekaibo nenako, Omaitemamo olisauti lilimekaka onawa ito elewoleyala ito uliki we lolo olimikakamidana abuha-wowola ito olisauti lilimitiye loko lo mololetaibo welimoya ujapa etibo elewoleyala maya aloya soto piye. <sup>11</sup> Sipisipi ja akalewamamidana oladalalotu ito osele deloko lukaha delamiyoko Omaidamu ga maya li soto molikaka abototi maya dabuha moliki asibitabo maya ne. Sa-ikiya miniki liki abomuya delamiyoko helitabo nesamukiya elamabo maya ne. <sup>12</sup> Sa-iminabo maya neyo, yamuya okuluma ulauka minabo wewenalita elowa jilo. Ito maya mikauka minabo ito ela nokuka minabolawalitaya agae, nenaha itahelae. Oloha maya edimotoka yaitaya nolimiye. Sa-iboya emo onawala maya aloya suwekolaiye. Sa-ekolaiyoko nenako, yamuya elenedanaki epalauka lalo lamiyoko nomoniye.

<sup>13</sup> Sa-ibo nenako, adoha oletehamidana maya oli hiki hulikayoko maya mikauka lemeko nebomuya elekadananaki oluho etaibo menamidana maya lowa he miye. <sup>14</sup> <sup>h</sup>Ito aya menamidana maya napa-napa nama luipamidana okana lowe maya lemekaiyoko, yalotiya ame mikaloka minoko leko okaka noibotoka maya adoha oletehamuya oli olo-loko woko sunaiye. Sakoya woko yaloka maya nedeko nasahili itiki minadeko meleke loweki makoki ito makoya hapuwaki le hulakolaiye. <sup>15</sup> Sa-okadeko mena maya oli etibomidana emesaloka maya adoha oletehamamoya eimola epalautiya no maya wile huladeko, aya nomamoya wileko lemekoko wile-loko woko aya menamidana maya ilime-loko wekolo sa-ive. <sup>16</sup> Sa-ekolo noiyoko, mikalimoya aya menamidana maya olisauti maya ilimekolo epala maya leko ka iyoko oletehalimo omu wile hulaibo no maya aya nesamidana epalaugo maya lemeko suwiye. <sup>17</sup> Sa-okaiyoko nenako, adoha oleteha maya epalo molokaiyoko oluho unala motasida maya Omaimo lo hukaibo ga maya eli ledanaki Jisesida gala maya emesalo moliki wetome ikaka niabo wewenasida maya lowa he bekolo wiye. Sako woko ela nomidana akeloka maya lemeko ne.

### Okohimi ula lowesida ganipo.

**13** <sup>1</sup><sup>i</sup>Sakoya neyoko mudaoboya ela nokuti maya okohimi ula makoya yowiye. Sakoya yowiboya aya adoha nesamidana madonaya 7-pala ne, ito sipiwala asako 10-pala ne, ito sipiwala makoko makoko nebotoya duliki wesida adakolinipo maya ne. Ito madonalo uliwa neboya Omaimidana leko letoko lokaka aya ne. <sup>2</sup><sup>j</sup>Sakoya neyoko okohimi

<sup>g</sup> 12:10 Job 1:9-11; Jek 3:1    <sup>h</sup> 12:14 Den 7:25; Den 12:7    <sup>i</sup> 13:1 Lev 17:3,7-12  
<sup>j</sup> 13:2 Den 7:4-6

ulamidana mudaoboya pusi napakidana oko nebo, ito beyae loko nebo nesamidana adela owakidana adela nebo, ito epala maya laiyoni okohimi ulakidana nebo ne. Ito adoha oletehamamoya eimola elewoleyala ito onowelaki siyala ito eimola we napa lolo oko netibo elewoleyaya maya miye. <sup>3</sup>Sa-okaiyoko adoha okohimi nesamamidana madona makoya kohaikayoko helenebo ileneyoko mudaoe. Sabolimoya hulala itikayoko suwoetokaiyoko haka liye. Sa-ikayoko muki numuto namato wewenasiya mudaikiki aiyo waiyo liki aya nesamidana emesalo moliki wiki suwae. <sup>4</sup>Sa-nikiya adoha oletehalimoya we napa lolo etibo elewoleyaya menebo maya ne liki omudaloka ekewake liki wiki ulila maya li sawa jiki monoka li me. Sa-iki okohimi nesamidana maya ilimi napa iki sa-liki lae: Okohimi nesa adoha mako emokidana minamiye. Ito wewena malokasiya lowa hiki kohaelamitabo ne.

<sup>5</sup>Sa-liki likadeko, emokahoya upala le sawa sawa jeko Omaimidana maya lewo letowo oko letiye loko elewoleyaya maya miye. Sakoya ukada 42-midana ulauya maya mikauka maya ujapa oko netiye loko elewoleyaya miye. <sup>6</sup>Yamuya Omai nebo ulila nebo ito okulumau minikaka niabolaki api oko lewo letowo oko ne. <sup>7</sup>Ito Omailoka eto iki minabo wewenakiya lowa hekoko asebetatiye loko elewoleyayamekaiyoko sa-okaka noiye. Ito numuto namato wewena dupanipo aito-aitomidana nebo ito aito-aitomidana dono jebo ito aito nala wewena mukisida duliki wenipo lolo oko netiye loko elewoleyaya miye. <sup>8</sup><sup>m</sup>Sa-ideko maya mikauka wewena mukisiya lipi miki uliwa maya li sawa jitatae. Ito ulinipo maya sipisipi ja akalewa kohai helebo wemamo elewole depa mutiwa litabo wewenasida dulinipo hapa maya mika soto pamiyoko nebo bukugu luhuwa je molaibo wewenaya edimogoya aya okohimi nesamidana sa-itamikilae.

<sup>9</sup>Data golotonetibo wewenalita ga maya eli wehe liki elilo. <sup>10</sup><sup>n</sup>Wewena mako nala numuku minatae loko lonebo wewena maya nala numuku minatae, ito malokasida maya sopolo hanaloti kohaidatae loko lonebo wewenasida maya asaiki sopolo hanaloti kohaidatae. Yamidana nesa maya soto pideko maya Omaimidana wewenalale yuha maya elewole iki Omailoka mini moliki minatabokumuye.

<sup>11</sup>Ito asako mika ulauti maya okohimi nesa mako yowiyoko mudaoe. Aya nesaya sipisipi jakidana sipiwalaya lowe nebo, ito onowa molaiboya adoha nesa leko oletehalimo omutoko molaibomidana oko molaiye. <sup>12</sup>Sa-noidanaki omutoko yowibo okohimi nesamidana elewolelaki nedanaki owisalo yowanuhena letoko ne. Sa-noidanaki mikauka numuto namato wewenasida maya lobetokaiyoko omutoko yowibo okohimi nesamidana hulala suwetokaiyoko helenebokuti aku sinaibo wemidana di bola hiki

---

<sup>k</sup> 13:5 Den 7:8,25; Den 11:36   <sup>l</sup> 13:7 Den 7:21   <sup>m</sup> 13:8 Sam 69:28; Lev 3:5; Lev 17:8;  
Lev 20:12; Lev 21:27   <sup>n</sup> 13:10 Jel 15:2; Jel 43:11

lipi miki dukanipo mikaka ae.<sup>13</sup> Ito alika soto pibo adoha okohimi nesalimoya aitomidana oliwaki nesa lolo okaka noiye. Sa-noidanaki aitomidana oliwaki nesa mako sakoya liye: Emokaho liyoko muki maya mikauka wewenasiya mudai-minayoko okulumaloti maya jo uluma oko maya mikauka limiye.<sup>14</sup> Yamidana elewole aneya lolo etiye loko elewolemekaiyoko omutoko soto pibo adoha nesamidana omudaloya lolo noidanaki maya mikauka wewenasida maya dilipe opa napa iye. Sakoya sa-noidanaki maya mikauka wewenasida maya lobetokaiyoko okohimi okaka nesamidanaya sopololotikohaike helikayoko aku sinaibo nesamidana weunawa maya li lolo ae.<sup>15</sup> Sakiya weunawa maya li lolo ikiki moli-minayoko alika soto pibo adoha nesalimoya aya nesalimo emoda elemekaka noibo mayae, loko weunawa maya le sawa jiyoko gahena maya lokaka noiyoko, muki wewenasiya di bola hi me. Ito samabo wewenasidayakohaidi hele.<sup>16</sup> Sabo nenako, yowi-minabolawa ito limiminabolawa ito uvaminanipoki wewena ito ebili li-minabowewenasida duliki we ito elekele wenipole mukisida maya lokadeko dade lamawakaloka ito otipanipoloka ane mako molakilae.<sup>17</sup> Ito okohimi ulamidana anelaya ulilahe ito ulilamidana nabalahe lamabolawasiya sainahena maketimi ikaka anuwa maya hiki li libitakilae.<sup>18</sup> Sa-onenako, ya anemidana monawaya data wehe lonetibowewenalitagoya wehe liki data kitae. Maloka wewenasiya data ki wehe litabolawasiya maya okohimi nesamidana uliwa nabala maya li soto moliki elilo. Aya nabaya we makomidana nabalaya 666 yamidana oko neyo.

#### 144 tauseni wewenasida dilimiboganipo.

**14** <sup>1</sup> <sup>o</sup>Sa-okaiyokoaku nomuda hulo moloko mudaoboya sipisipi ja akalewa maya Jelusalemu numutoka Jaiyoni bolalo maya sinoneyoko mudaoe. Sa-iboya wewena 144tauseni wewenaya magoinaya ja akalewa makiyaminayoko mudaoe. Sakiya otipanipoloya eimola uliwaki ito aholada uliwakiyajeneyoko mudaoe. <sup>2</sup> <sup>o</sup>Sa-niayoko, okulumaukatiya onowa mako eloboya no lisada napakidana sasa loko limiye. Sa-noiyoko musiki jikaka wewenasi musiki napakidana sakiyanijeyoko onowa napa-napa lokaka noibokidana onowa liyoko eloe. <sup>3</sup> <sup>o</sup>Sa-niayoko, onowelaki siyamidana amaitokaya elewole nesa loweki loweki ito olopa we loidawa 24-sida dokepaloka maya nama ohatama liki minikaka niaboya, aya namaya muki wewenasi elamitabo nesa leko ne. Wewena 144tauseniya muki numuto namato wewenasi kuti meina heko hulobetaibo wewenasi goya elitabo namaya ne. <sup>4</sup> Aya wewenaya we mena olisa amiki minikaka niabosiya sipisipi ja akalewa nebokaya emesalo moliki wikkaniabosiya numuto namato wewena malokasitokati

<sup>o</sup> 14:1 Iji 9:4; Lev 7:3

Omaimidana amaitoka ito sipisipi ja akalewamidana amaitoka mini moliki minikaka niabolawagoya api oko dilipe molaibolawago minae.  
<sup>5</sup> Edimoya suwa ga mako depauka minamibo ito saina li opa-napa ikaka niabo nesa liki samabo ne.

**Okananipoki we loweki makokisida ganipo.**

<sup>6</sup> Sakoya mudaoboya okulumalo yowaya okanaki we makolimoya olo-loko moneko elewole iki minatabo ga lalo ito miniwa miniwa iki minatabo ga maya leko moneko muki numuto namato wewena dupa aito aito nebohena ito aito aito dono jebo wewenahena ito aito aito nalaukati wewenasida maya lo soto moloko lo beko moniye. <sup>7</sup>Sakoya ga napauti sa-loko ju loko liye: Edimoya Omaimidana oliwa miki uliwa li sawa jilo. Wewenasida ona molobetatibo onawa maya alo alili okaiyoko muki okulumau nebo nesaki ito maya mikauka nebo nesaki lolo ibo wemidana uliwa li sawa jilo.

<sup>8</sup>Loko liyoko okanaki we mako emesalo niseko sa-loko ju loko liye: Babiloni eba maya alo lemeko udokaiye. Aya ebato wewenasiya numuto namato wewenasidaya elewole waeni no nalo nalo liki ula molikaka niabo nesa liki muki we menasida olisa ilo liki ula molikaka niabomuye loko lemeko udokaiye.

<sup>9</sup>Loko lokoko wokaiyoko okanaki we makolimo emesalo moloko niseko ju loko ga napauti sa-loko liye: Wewena mako okohimi okaka nesalohe ito aya nesamidana weunalohe di bola hiki lipi mitahe ito anewa maya otipanipolo molatahe ito dadenipoloya emo luhuwala maya ji molatahe, <sup>10</sup>edimoya nei nokidana oko Omaimidana mesaha nebo noya aha noki le opa-napa amoko mesaha jetbetatibo lapeuti maya libideko natae. Sa-ikadeko eto oko nebo okanaki weki ito sipisipi ja akalewaki domudanipolo maya joki ito sihuga ehadakiya jo lokadeko aya joku maya limiki miniki miluma-aluma eliki minakilae. <sup>11</sup>Sakiya yamidana miluma elitabo wewenasiya miluma eli-liki witaboya ma liki suwamikilae. Sa-ideko jokilawa maya yoweko minowa minowa oko minakolaiye. Sa-onenako, okohimi nesalo ito aya nesamidana weunalo lipi mikaka niabo wewena ito uliwahena ito anelahena li-minabo wewenahena maya alikaya miluma elitabo nesahena dupalo soto pekolaiye. Sa-etiboya aya nesalimoya keke hulobetametibo ne. Sakoya hulobetamideko, muki yupeka maya sakiya milumago eliki minakilae. <sup>12</sup>Loko libo nenako, Omaimo lo hukaibo galaki Jisesida galamaki li pilikiki li-miniki monokala emesalo molatabo wewenaya Omaimidana oluholia maya elewole iki minatabokumuye.

<sup>p</sup> 14:8 Aes 21:9; Jel 51:8; Lev 18:2   <sup>q</sup> 14:10 Aes 51:17; Iji 38:22; Lev 19:20

<sup>r</sup> 14:11 Aes 34:10

<sup>13</sup> Sa-okaiyoko okulumaloti maya ga mako sa-loko liyoko eloe: Oloti maya onawalotiya We napaloka nisiki omiki miniki helitabo wewenaya obohanipouka lahelepa ekolaiye loko luhuwa jo. Loko liyoko Omailidana weuna oluholimo sa-loko liye: Yotokoe. Dowa liki iki molika abomidana ihilawa ji-liki witabo nenako, edimoya yamidana yowanu liminabokuti maya mini eliki eha jiki minakilae.

**Maya mikauka yowanumidana ulawa ona molatibo ga.**

<sup>14</sup> Ukulo limu mako alinali soto nopyoko mudaoe. Sa-iboya aya limu mupilaloya wewenakidana nesa mako neboya madonaloya duliki wesida adakoli goliloti lolo abo olo jene. Sakokoya adelau maya nodenesa hukokaka emita mako lene. <sup>15</sup><sup>s</sup>Sakokoya neyoko okulumau monoka numukuti maya okanaki we makolimo lemeko limu mupilalo nebo wemidana maya ju loko ga napauti sa-loko lo miye: Miyakuka yowanukamidana nodenesa ihilawa maya alo soto peko suwokaiyoko, emitakaloti ula nesa maya hukoko le molo, hukatadawo onawa maya aloya alili okaiyo. <sup>16</sup>Loko lokaiyoko limu mupilalo nodenesa hukokaka emita lenebo wemamo mikauka mijakuti yuha nesa mukiya hukoko le esa iye.

<sup>17</sup>Sa-noiyoko okanaki we makolimo asako okulumau monoka numuda napauti maya naibo emita mako ovaloka apu onebo emita makoya lekoko nisiye. <sup>18</sup>Sa-iyoko iwela makoya okulumau Omailoka jokila hi mikaka namabetalokati nisiye. Aya okanaki weya jomidana ujapa welaya nisekoko emita lenebo wemidana maya lahelamabo wewenasida obi obetabibomuya koha moloko ga napauti sa-loko ju loko lo miye: Ihilawa maya aloya halatoko suwoneyo, emitakaloti yaitaya waeni nala ihilawa maya hukoko le hulo. <sup>19</sup>Loko lokaiyoko emita lenebo wemamo emita hulo moloko hukomo nowidanaki waeni nala ihilawa maya hukoko suwiye. Sakoya hukoko suwokaiyoko Omailidana auhalamidana esopa jekaka noibo ehadmidana iwauka maya usiki molayoko aya ehadalimoya mijeko otele iye. <sup>20</sup><sup>t</sup>Sakoya ohuloka esopa jibokuti maya Omailo auha bibo wewenasida oladanipo maya nogo lemeko ne. Lemeko nohuda molaiyoko 2 mitaloya makoko aweyaha oko moloko waitoko lemo jiye. Aya nohudaya molaibo hanawaya 320 kilomitaya molo-loko woko neyoko mudaoe.

**Okananipoki we 7-palasiya lowa-lawa nesa napa li-minae.**

**15** <sup>1</sup>Sa-okaiyoko okulumau maya luhuwa oliwaki aitomidana mako soto piyoko mudaoe. Ito okananipoki we 7-palasiya lowa-lawa nesa napa 7-pala ma mikauka wewenasito soto pitibo nesa li-minae. Aya

<sup>s</sup> 14:15 Joe 3:13   <sup>t</sup> 14:20 Aes 63:3; Lev 19:15

nesaya soto pitiboya Omaimidanā mesahala maya suwetibo nenako, mukiya nisekoko suwekolaiye.

<sup>2</sup>Ito ela no mako mudaoboya, jo ulumalotiki ito galasilotiki li opa-napa ikiki lolo i-minabo ilekaiboya neyoko mudaoe. Ito okohimi nesamamidana nabala ito uliwanidana nabala ito weunalamidana lowa hiki asibitiminatabo wewena maya galasiloti ela no lolo abomidana ilikalokaya Omaimidanā musikila jikaka nesa napa li-minabo wewenaya sini-minayoko mudaidoe. <sup>3</sup>"Omaimidanā elekele wela Moseseda namala ito sipisipi ja akalewamamidana nama sa-liki layoko eloe:

Ke, We napate ode amode nesa lolo adawo welika, oko moloko adawo nesakaya yoweko ne. Ito oliwaki nesa lolo okaka noadawoya numuto namato wewenasida we napanipo anuka wehe loko ne. We napatelika, wewena makolimoya oli emametibo aveyaha oko minamiye, ito ulika li napa amitabo wewena minamae.

<sup>4</sup>"Emo makokolikaya eto oko minaninako, muki numuto namato wewenasiya emodagoya di bola hi imikilae. Emokahoya wehe loko oko moloko adawo nesa maya soto pekaiye.

<sup>5</sup>"Liki layoko mudaoboya okulumau monoka numuda napamidana eto onebo sahayamidana atedawa maya leko golotiyoko mudaoe. <sup>6</sup>Sakoya golotokaiyoko, okananipoki we 7-pala maya saina delokaka noibo nesa napa li-minabo wewa maya monoka numuda napauti maya leme. Dupalo nesa maya ukulogo olo jikiki ohanipolo maya goliloti lolo abo ebe je. <sup>7</sup>Ito elewole oko minokaka nesa loweki lowekiloti maya makolimoya okanaki we 7-palasida lape 7 maya goliloti lolo abo lapeya beloko wiyoko dadeu maya li-minae, aya lapeuya Omai minowa minowa oko minokaka noibo wemidana mesaha jibo nesalimogoya waitone. <sup>8</sup>\*Ito monoka numuda napamamidana ukarya Omaimidanā elewoleyalaloti ito lamedalalotot jokilalaya waitokoko ne. Sa-iboya okananipoki we 7-palamasiya adoha lowa-lawa nesa 7-pala li-minabo maya owaha li soto moli suwamabō nenako, monoka numuda napamau yowikaka anu maya heko li lokaiyoko yowamabō ne.

**Lapeuti maya liki kisikayoko Omamidana epalo molaibo nesa limibo.**

**16** <sup>1</sup>Sa-okaiyoko monoka numuda napauti maya okananipoki we 7-palasida maya ga mako sa-loko lo biyoko eloe: Edimosiya wiki lape 7 maya liki kisideko Omaimidanā mesahala maya mikauka limitiye.

<sup>2</sup>"Loko liyoko, okanaki we naba 1 mamoya lapela maya leko kiseko hulikaiyoko maya mikauka maya limiye. Lemeko okohimi nesamidana

---

<sup>u</sup> 15:3 Eks 15:1   <sup>v</sup> 15:4 Jel 10:7; Sam 86:9   <sup>w</sup> 15:5 Eks 38:21   <sup>x</sup> 15:8 1 Kin 8:10-11;  
Aes 6:4   <sup>y</sup> 16:2 Eks 9:10

anela li-minabo ito weunamidana di bola hi mikaka niabo wewenasisitoka maya mika ihi napa soto pekoko dupaloka matokaya mika ihilimogo iyoko miluma ele.

<sup>3</sup>Ito okanaki we naba 2 mamoya lapela leko kisiyoko ela nokuka maya lemeko helebo wewenasida oladanipokidana lolo noiyoko, ela noku minabo nesahena maya muki heliki suwae.

<sup>4</sup><sup>a</sup>Sa-iyoko okanaki we naba 3 mamoya asako lapela leko kise hulikaiyoko muki no lasomosolauka ito no hiki nikakauka muki no nebokukaya oladalimogo iye. <sup>5</sup>Sa-okaiyoko okanaki we mako no ujapalo huloetonebo wellimoya sa-loko Omaimidana lo meko liyoko eloe: Nisomao minadawo we minakolane. Emoya lahelamibo nesa sakoya pasokaka nesaya le wehe loko lolo adawo nesa maya olotiya soto pekaiye. <sup>6</sup>Sa-iboya Omaimidana wewenala minabo ito Omaimidana epalauti ga likaka wewena minabosiya oladanipo kisebo nenako, yamuya olada noya biyoko naboya wehe loko ne. Lahelamibo nesa li-minabo wewena malokawasida maya wati oko bekane. <sup>7</sup>Loko liyoko, Omaimidana jokila hi mikaka namabetauti maya ga mako sa-loko liyoko eloe: We napate Omailikaya, ode amode nesa lekaka noadawo we maya minaninako, ele wehe lo-minoko lihimaya pasokaka noane.

<sup>8</sup>Loko liyoko okanaki we naba 4-mamoya lapelau nebo nesa maya leko kiseko hulikaiyoko, ho maya holo-polo toko letiye loko elewoleyamekaiyoko, muki wewenasida maya holimo lowe wotowe iye. <sup>9</sup>Sa-okaiyoko wewenasida maya ho mumusikasilimo lowe wotowe iyoko, Iowa-lawa nesa muki wewenasisitoka soto pibo nesa le soto pibo wemidana ulila maya liwi letiwi iki laboya, mulutipo li wili jamae. Sa-ikiya Omaimidana luhuwala maya li sawa jamae.

<sup>10</sup><sup>a</sup>Ito okanaki we naba 5-limoya lapelauti nesa maya lahelamibookohimi nesamidana onowelaki siyalo maya kisekaiyoko limiye. Sakoya lemekaiyoko emo oholau maya limu napa-napa voko ne. Sa-okaiyoko emesalo molabo wewena maya miluma-aluma eliki depa tala-mitala iki minae. <sup>11</sup>Sa-okaiyoko nenako, miluma elebomuya ito mika ihi jelebomuya okulumau Omaimidana liwi letiwi itikaka iki minae. Saboya duka li wili jiki lahelamibo nesa lolo abo maya hulamabo ne.

<sup>12</sup><sup>b</sup>Sa-iyoko okanaki we naba 6-mamoya lapeuti no maya leko kise hulikaiyoko napa-napa no Yupeletiyo loko nebo nokuya limiyoko aya no maya lano oko suwiye. Sa-iboya ho noyowibotokatiya duliki we mako nisikilae loko anunipo le wehe lobetaiye. <sup>13</sup>Sa-okaiyoko nemoya mudaminoyoko adoha oletehamamidana epalauti ito okohimi nesamidana epalauti ito suwa monoka lokaka wemidana epalauti maya oloha loweki makokiya osulepakidana iki yowe. <sup>14</sup>Edimoya Olohamidana elekele

<sup>z</sup> 16:4 Eks 7:17-21; Sam 78:44   <sup>a</sup> 16:10 Eks 10:21-22   <sup>b</sup> 16:12 Aes 11:15

oluholasida elewole aweyaha itae loko yamidana elewole li-minadaki muki numuto namato duliki wesida esenipouka maya li ahu likayoko, Omai ode amode nesa lolo okaka wemidana onawala napalo maya li esa iki lowaya hikilae.

<sup>15</sup> <sup>c</sup>Eli-minahe, nemoya ukelelo wemidana oko alinali oko niseko hetakoloe. Sa-etubo neyo, wewena mako upa sapago minatiboto nisekoyoko owaka luwekatyi, weutipo makoko aweyaha iki moliki ujapa iki minataboya elowa jikilae, loko We napalimo noliye.

<sup>16</sup> <sup>d</sup>Ito olohasiya lowa hetune liki numuto namato duliki wesidaya mika maya Juda gaukatiya Alamagedoe liki laboto maya li nupa iki minae.

<sup>17</sup>Sayoko, okanaki we naba 7-mamoya lapeuti maya ohalalo yokala kise hulikaiyoko limiye. Sakoya nolimiyoko monoka numuda napa nebottotiya onowelaki siyalokati maya onawa maya alo suwokaiye loko ga napauti maya ga mako limiyoko eloe. <sup>18</sup> <sup>e</sup>Sa-loko limibolimoya alake nolidanaki o pana nokidanaki, onowa napa moloko ne. Sa-okaiyoko mima napa-napa noiyoko mudaobo maya wewena omutiki minabotoya mima yamidana amibo mima iye. <sup>19</sup> <sup>f</sup>Sa-okaiyoko Babiloni numuda maya lukoko le loweki makoki iye. Ito numuto namato wewenasida numuda napa maya lemoko udaiye. Ito aya Babiloni numuda napa ahonipodamuya Omailimo elenedanaki waeni nomidana oko mesaha jebetatibo lapeuti maya biye. <sup>20</sup> <sup>g</sup>Sa-okaiyoko mika owala napa nebo ito bolahena ito weuhahena maya muki tolowa oko suwiye. <sup>21</sup> <sup>h</sup>Ito omoi mako napa-napa okulumalotiya ehada moludakidana lemeko muki wewenasidaya maya kohaidomo wiye. Sa-okaiyoko Omailimo wavu-leko wewena kohaidaibomuye liki Omailidana maya liwi letiwi ae.

### Muki wesida le udokaka menakidana eba napamidana galae.

**17** <sup>1</sup> <sup>i</sup>Sa-okaiyoko, okananipoki we 7-palauti makolimoya nemotoka niseko sa-loko lo nimiye: Niso, muki wesida le udokaka menakidana eba napaya no akononalo nebomidana lihimala maya leko wetibo nesa maya emoda ilipekoloe. <sup>2</sup> <sup>j</sup>Ito numuto namato duliki wesiya aya menakigoya udikaka ikaka ae. Ito numuto namato wewenasiya aya menakipalokatiya waeni nomidana olisa metune likadanaki, madonipou maya opa okaka noiye. <sup>3</sup> <sup>k</sup>Sa-etibo nesa maya mudatune loko lo nemekaiyoko nukane maya le wili jekoko ame mikaloka maya nilime-loko wiye. Yaloka maya woko mena mako mudaoboya okohimi nesa mako lahomidana mupilalo neyoko mudaoe. Aya nesamidana upalaloya luhuwa mako neoya, Omailidana leko letoko lokaka luhuwagoya

<sup>c</sup> 16:15 Mat 24:43; Luk 12:39; Lev 3:3    <sup>d</sup> 16:16 Jek 12:11    <sup>e</sup> 16:18 Lev 8:5; Lev 11:13,19

<sup>f</sup> 16:19 Aes 51:17    <sup>g</sup> 16:20 Lev 6:14    <sup>h</sup> 16:21 Eks 9:23; Lev 11:19    <sup>i</sup> 17:1 Jel 51:13

<sup>j</sup> 17:2 Aes 23:17; Jel 51:7

waitoko jenebo ne. Aya nesamidana madonaya 7-pala minoko ito sipiwala maya 10-pala ne.<sup>4</sup> Aya nesamidana mupilalo nebo mena maya upaloya okohudaki lahoki nebo nesa le koloko ne. Aya menalimo upalo nesaya meinawa napa-napa nebottot meina hiki kolikaka nesaki golilotiki lolo i-minabo nesagoya kolaiye. Ito adelau lape maya goliloti lolo abo leneboya, we li udikaka nesa ito olu ipa udikaka nesa ito nuwamalo nesa waitokadanaki nebo ne.<sup>5</sup> Ito otipalaloka maya suna ibo uliwa mako sa-loko luhuwa jene: Babiloni numuda ebaya muki numuto namato we li udikaka menakipasida donipo ito omusepanipo yowekaka noibo nesamidana donipo nemoya minoe.<sup>6</sup> Ito aya menaya Omaimidana nisomao liki minabo wewena ito Jisesitoka nisiki omiki minabokumuye liki kohaidi helebo wewenasida oladanipo maya noko noko madonau maya opa oneyoko mudakodanaki topa oko ga loko emesalo moloko onoto lamoe.

<sup>7</sup>Sa-okaiyoko okanaki wemamo sa-loko loka onetaiye: Nenahamuya epa limiye. Nemoya aya menamidana monawa ito emesalo nomonibo okohimi nesamidana monawala ito adoha okohimi nesa madona 7-pala nebo ito sipiwala 10-pala nebo nesamamidana monawala maya olotiya lo soto moloko lo imituyo, elo.<sup>8</sup> Omutoko mudadawo okohimi nesa maya omudalaki nebo maya olotiya minamiye. Ito alikaya nokuti maya wili jeko yowekoko woko sima nakolaiye. Omutoko malo nebo maya olotiya minaminako, alikaya aku wili jeko nisekolaiye. Yamuya alikaya maya mikauka wewenasiya muda-elikiki eke litakilae. Elewole depa mutiwaki minabo wewenasida maya mika soto pamibotokati yeimaya dulinida jibo buguku ji molamabo wewenasiya sa-iki eke litakilae.

<sup>9</sup>Ito olotiya madonipo golutebeo wewenasiyoga aya nesamidana monawaya ele wehe loko eletudawo ne loko lone. Madona 7-palasiya aya menalimo esewa heko nebo ebamidana bola 7-palasida aweyahanipoya ne.<sup>10</sup> Ito okepala 7-palaya duliki we 7-palasida aweyahanipogo minae. Sa-iminabo neboya, edimokutiya dulinipoki we 5-palaya alo limi jikae. Ito makomagoya olotiya aha ne. Sakoya makoya soto pekoko onawa lasolasli netiye loko loetone.<sup>11</sup> Okohimi nesaya hapa nebo maya olotiya onawala minamibo nesaya we napa 7-palamasitoka maya woko omekolaiye. Sa-okaneko olotiya nabaniro maya 8 okadeko minoko emoya sima nokakaku maya woko hilekolaiye.

<sup>12</sup><sup>m</sup>Ito sipiwanipo 10-pala neyoko mudadawo nesaya dulinipoki we 10-palasida aweyahanipogo ne. Sa-ikikiya yowanunida maya olotiya api amabo ne. Duliki wesiya yowanunipo maya okohimi nesamaki magoina onawa minawasiya likilae.<sup>13</sup> Edimoya elikakawanipoya makoko minadeko adoha okohimi nesamidana elekele itiki elekeleyanida emo

<sup>k</sup> 17:4 Jel 51:7   <sup>l</sup> 17:8 Den 7:7; Lev 11:7; Sam 69:28; Lev 13:8   <sup>m</sup> 17:12 Den 7:24

adelauya molakilae.<sup>14</sup> Sa-ikiki Omaimidana sipisipi ja akalewa maya lowa ulanipolo we lolo itiki minakilae. Sa-itaha Omaimidana sipisipi jala akalewalimoya abuha moloko dipisekolaiye. Sa-nideko emo we napasida ito duliki wesida We napanipo maya nenako, eimola uliki we lolo etiboto minataboe loko wewenala yuhaside maya ju loko dilipe eto okadeko emotoka nisiki omiki minabo wewenakiya magoinaya moletiki minakilae.

<sup>15</sup>Loko lokoko amida meko sa-loko lo nimiye: No napa maya wesida le udukaka mena ilikaka neyoko mudadawo noya numuto namato aito aito donoki wewena ito aito aito nala ito aito dupaki wewenasida aweyahanipoya ne. <sup>16</sup>Ito sipiwa 10-pala mudadawoya dulinipoki we 10-palasaki okohimi nesalimoki we le udukaka menama auha mikiki ipisiki hulikadeko upa sapago minoko helideko milawa maya hikadeko maloka maya jolimo lekolaiye. <sup>17</sup>Sa-etiboya aha samekolaiye. Omailimoya madonipou ga maya molokadeko emo gala maya eli-liki obohanipouka makoko aweyaha oko minadeko elewoleyanida maya okohimi nesamidana adelau molikiki aya nesamidana maya elekele itiki minakilaiye. Sakiya minadeko Omaimidana gala maya niseko ulolotekolaiye.

<sup>18</sup>Ito mena makomidana mudadawoya numudala napamidana aweyahala ne. Sa-iboya aya numuda ebaliyoma muki numuto namato wewenasida numuda ebanipomidana ahonipoya lolo okadeko elekele itiki minatae loko abuha-wowola lenebo maya ne.

### Babiloni eba maya lesi ibo ga.

**18** <sup>1</sup>Sa-okaiyoko okanaki we mako okulumauti limiyoko mudaoboya, galamidana elewoleyala asekone. Sakoya lamedalalimoya ma mikauka muki he lameda liyoko mudaoe. <sup>2</sup>"Lemeko ga napa loko sa-loko liye: Babiloni eba maya alo lesi okaiye. Sakoya lesi okaiyoko aya numutapoto maya aito aito olohasi eba lolo oko ne. Sakoya lahelamabo aha-namasi numuda lolo oko ne. <sup>3</sup>"Muki numuto namato wewenasiya nei biya nokidana nesa liki we le udukaka noibo menamamidana nesa mikili ikaka abo maya ne. Numuto namato olopa wewenasiya aya we le udukaka noibo menakiya aya nesa lolo iki minikaka i-minabo maya ne. Numuto namato bisinisi lolo ikaka wewenasiya aya yowanumidana uvaminala wavu-leko nebo uvamina likiki uvaminanipoki wewena lolo abo ne.

<sup>4</sup>"Loko lokaiyoko okulumauti ga napa makoya sa-loko liyoko elo: Wewenanele yuhalita aya eba yaitaya hulikiki oli wilo. Yauya miniki

---

<sup>n</sup> 18:2 Lev 14:8; Aes 13:21; Jel 50:39    <sup>o</sup> 18:3 Lev 14:8    <sup>p</sup> 18:4 Aes 48:20; Jel 50:8;  
Jel 51:6,45

aya ebamidana lahelamibo nesala li wati ikadeko maya lowa-lawa nesa maya edimotoka je-loko nisekatayo. <sup>5</sup><sup>a</sup>Aya ebamidana lahelamibo nesala yaitalimoya emo mupilalo mupilalo oko yoweko okulumu ade litibo nesa noliyoko noloyo. Sa-iyoko nenako, Omailimoya lihimalamu ata molamiye. <sup>6</sup><sup>b</sup>Sa-onenako, lahelamibo nesa lolo ilibitaboto dade lihima liki alikaya mupilalo mupilalo iki bimi yowilo. Edimodaya ekesa nesa natae liki li lolowa ilibitabo maya li-liki yowiki mupilalo moliki bitayo. <sup>7</sup><sup>c</sup>Watimidana mupilalo miniki dupanipo liki yowikaka iki minadanaki, meleke iki minikaka i-minabo maya ne. Sabomidana makoko aweyaha oko mulunipou miluma nesaki delo wokaka nesakiya li soto molibitalo. Aya eba menalimoya we napakidana ukalotiya nemo mena napa minoe. Nemoya eto mena minamoe. Sa-onenako, miluma elamoko hulumidana mupilalo mino-loko woko minakoloe. <sup>8</sup>Loko lokaka ibo maya nenako, ya ebatokaya makoko onawaloya lahelamibo nesa mukiya upalo soto pekolaiye. Helekaka nesa ito mulunipou itihina okaka nesa ito nodekumu helikaka nesaya soto pideko aya ebaya jolimo loko suwetiboya We napa Omaimidana elewoleyalalimoya lihimalamu obi oetatibomuya ne.

<sup>9</sup><sup>d</sup>Ito numuto namato dulnipoki wewenasiya aya menaki we olisa mena olisa iki jo ehada iki niki miniki meleke iki minikaka abo wesiya aya ebakutiya jokila mako yowideko mudaikiki eke liki miluma elitae. <sup>10</sup><sup>e</sup>Sakiya edawaki nesa niseko wiboya mudaikiki domodanipo nowideko, hotokaya miniki sa-liki likilae: Agae, Babiloni numuda eba napa maya lihimakamidana meinawa maya alinali soto pekaiboya, liki likilae.

<sup>11</sup><sup>f</sup>Ito numuto namato wewena bisinisi lolo niabo wewenasiya uvaminate maya ekahimamo meina hitibo ne liki sakiya miluma elitae. <sup>12</sup><sup>g</sup>Uvaminanipoya sa-iki meina hikaka abo ne: Goli ehada ito siluwa ehada ito meinawa yoweko minokaka ibo ehada aito aitomidanaya ito meinawa yoweko nebo peseku ito onowelaki dupalo nesa mukiya ukulo ito okuhudago ito lapa jamibolawa ito laho ito numuda vikaka ya lalo aito-aitomidana ito elopani ja sipiwalalotlolo abo nesa ito aito-aitomidana lalo ya mako ito ainiloti ito ula ehadalotlola sainahena li lolo abo nesae. <sup>13</sup>Ito siloheda nuwala aito-aitomidana wibo nesa ito nuwala dowa libo paula Omaimitoka jokila hi mideko nuwala lalo nesa yowitibo nesa, ito nuwala lalo wibo netupa ito waeni no ito gilisihena ito polisihena laisihena ito sipisipi ja, bulumaka ja ito hosi ja ito hosi jasi ika ikaka niabo nesahena muki lalo nesa, ito elekele yowanu liki ehada lamabo wewena, ito wewenasida weunipo moliki meina hikaka niabo nesa lalohenalo moni yowanu likaka abo ne. <sup>14</sup>Ito bisinisi yowanu likaka wewenasiya sa-liki lae: Mida numudakamidana ujapa lalo oko minokaka

<sup>q</sup> **18:5** Jen 18:20-21; Jel 51:9    <sup>r</sup> **18:6** Sam 137:8; Jel 50:29    <sup>s</sup> **18:7-8** Aes 47:7-9

<sup>t</sup> **18:9** Iji 26:16-17    <sup>u</sup> **18:11** Iji 27:31,36    <sup>v</sup> **18:12** Iji 27:12,13,22

adawo nesaka maya woko aha nesa lolo suwokaiye. Umu helepele nesakahena maya woko aha nesa lolo suwiye. Ito onoweka maya woko aha nesa lolo okaiye. Sa-okainako, nенahama lolo okoko aku litadawo ne liki lae.<sup>w</sup> Sa-ikiya aya ebakuya yamidana yowanuhena liki sainahena meina hiki moni yowanu liki uvaminaki wewena lolo ikaka abo maya edawaki nesahena maya woko aha nesa lolo iboya mudaikiki hotoka sini-miniki wije nama liki sa-liki likilae:<sup>x</sup> Agae, numuda eba napa-napamae. Upalo nesaka ukulo okohuda laloya luhuwaki onowelaki le kolokaka adawomae. Ito onoweka lekaka noadawo nesaka aito-aitomidana meinawa yoweko nebo nesamidana mupilalo minokaka adawomae.<sup>y</sup> Sadawo maya neboya, numuda ebaka ito mida numudaka luko-mako oko leso iye.

Ito noku palusimidana ahola ito wenoka wewena ayau minabo ito palusigu yowanu likaka abo wewenasikiya asaikiya jokila yowitibo maya mudaikiki hotoka sini-minatahelae.<sup>z</sup> Sakiya miniki miluma eliki sa-liki litae: Agae, numuda eba napa maya nenako yamidana numuda eba mako nakahaloka netiye.<sup>z</sup> Liki likiki uha lada iki miniki sa-liki litae: Agae, eba napamae. Aya ebamuye liki ela noku palusi aholasiya aya ebalotiya mida numuda uvamina lolo ikaka abo wewena maya alinali ametoko suwokaiye liki litae.

<sup>20</sup><sup>a</sup> Okulumau minabo ito Omaimidana wewenala ito aposolo ito Omaimidana epaloti ga wetome ikaka niabo wewenalitya elowa jiki mulutipou lalo ideyo. Aya numuda eba napamidana lihimala edimotoka nebo maya Omaipomamoya olotiya pasobetokaiye.

<sup>21</sup><sup>b</sup> Loko okanaki wemidana gala maya sakoya soto pekaiyoko, okanaki we mako elewoleyalalimoya ehada napa makoya oheko leko nisekoko ela noku maya ipisoko hulikaiyoko limiye. Sakoya nolimiyoko sa-loko liye: Babiloni eba napa maya sakoya abuha moloko ipiso hulikadeko noku limibo nesa leko woko aha nesa lolo ekolaiye.<sup>22</sup> <sup>c</sup>Ito musiki jiki gita jiki holopenipo ito pikulinipo huhu liki minikaka abo wewenasida ononipo maya aya ebakuya aku soto pamekolaiye. Ito dadeloti luhuwa moliki sainahena li soto molikaka abo wewenahena maya aya ebakuya minamikilae. Yamidana yowanu kou kou libo nesahena mayaaku soto pamekolaiye.<sup>23</sup> <sup>d</sup>Sakoya mukiya ametekolaiye. Lemidana lamedala maya edimotoka soto pamekolaiye. Ito li welo menalo itabo onawamidana ganipo maya ya ebakuya aku soto pamekolaiye. Bisinisi yowanu likaka wewenatiposiya numuto namato we napa lolo iki minikaka abo maya neboya, ito iheda yahamedatipolimo numuto namato wewenasida

<sup>w</sup> 18:15 Iji 27:31,36   <sup>x</sup> 18:17 Iji 27:26-30   <sup>y</sup> 18:18 Iji 27:32   <sup>z</sup> 18:19 Iji 27:30-34

<sup>a</sup> 18:20 Dut 32:43; Jel 51:48   <sup>b</sup> 18:21 Jel 51:63-64; Iji 26:21   <sup>c</sup> 18:22 Aes 24:8; Iji 26:13

<sup>d</sup> 18:23 Jel 7:34; Jel 25:10

dupanipo maya dilipe opa-napa iye.<sup>24</sup> <sup>e</sup>Ito Omaimidan epaloti ga likaka wewena ito Omaimidan nisomao liki minabo wewenaya monokamuye liki kohaidiki helebo wewenasida oladanipomidana meinawaya aya eba napaloya nebo maya nenako, yamuya yatoka nesa lolo oetatiye.

**19** <sup>1</sup>Sa-okaiyoko okulumautiya wavu-liki wewenasiya ga napauti sa-liki layoko eloe: Omaimidan epoka lilo, lahelamibo nesauti lilimekaka ito onowelaki lameda ito elewoleyalaya Omaitoka makoko neyo. <sup>2</sup>Emokahoya lihimatemu lekaka yowanu maya lekaiyoko woko wehe lokaka noiye. We olisalo mena numuto namato wesidaya api obeko sa-iki sa-iloko lokaka oko dilipe opa okaka ibo menamamidana lihimala maya onuwa pasiye. Sakoya Omaimidan elekele wewenasida kohaidi helebomidana oladanipo maya emotoka nebo maya pasokaiye liki lae. <sup>3</sup><sup>g</sup>Liki likiki Omaimidan epoka lilo liki oha liki oha liki eba napamalo jokila yowewa yowewa oko minakolaiye liki lae. <sup>4</sup>Ito olopa we 24-pala ito elewole oko minokaka nesa 4-palamasiya di bola hiki Omai onowelaki nebo siyalo nebo wemamidana maya sa-liki lipi miki lae: Yotokoe. Omaimidan epoka lilo.

### Omaimidan sipisipi jala maya mena makomidana lemo mibo ga.

<sup>5</sup><sup>h</sup>Sa-okaiyoko onowelaki siya nebotokati maya onowa mako sa-loko soto piye: Omaimidan elekele wewenala yuhalitaya, ekela litalo. Yowiki minabo limiki minabo wewenala yuhalitaya maya oliwa miki minikaka niabomidana iki minalo. <sup>6</sup><sup>i</sup>Liki likayoko, akuya muki wewenasida dononipo eloboya, no lisadakidana sasa loko go alakekidana neyoko ga napa mako sa-loko soto piye: Omai ode amode nesa lekaka welimo uliki wete lolo oko ujapa olimikaka yowanula olotiya soto piyo, epoka lilo. <sup>7</sup>Lemoya elowa jeko muluteu lalo ideko ulila le sinatuniyo. Omaimidan sipisipi jalnidana mena lemo mitibo onawa maya aloya alili okaiye. Wewenala yuha maya emo menala lolo ikili li lolowa ikae. <sup>8</sup>Emokahoya ukulo hae-paetonetibo nesa maya li kolatae loko lonebo maya ne. Omaimitoka koliki minabo wewenasiya wehe libo nesago lolo iki moliki ikaka abolimoya dupalo nesaya lolo okaiye.

<sup>9</sup><sup>j</sup>Loko ga mako soto pekaiyoko, okanaki we makolimoya sa-loko lo nimiye: Emoya sa-loko luhuwa jo: Omaimidan sipisipi jalnidana mena lemo mitibo onawaloya lalo nodenesa natae loko lesa mo lo libibo wewenalityaya mulutipou lalo elilo. Loko lokadanaki ga mako sa-loko liye: Maya lo noemobo aya Omaimidan gala wehe loko lo noemoe. <sup>10</sup>Loko lokaiyoko ni bola heko lipe mituwe loko noyoko, o'e loko lokoko sa-loko liye: Sako samo. Nemoya iweka elekele we iweka Jisesida maya

<sup>e</sup> 18:24 Jel 51:49   <sup>f</sup> 19:2 Dut 32:43   <sup>g</sup> 19:3 Aes 34:10   <sup>h</sup> 19:5 Sam 115:13   <sup>i</sup> 19:6 Iji 1:24  
<sup>j</sup> 19:9 Mat 22:2-3

lo soto molaibo ga li etoha iki li-minikaka niabo wewenasida iwenipo minoe. Omaimidanago lipa mitane. Jisesikaho lo soto molaibo galimoya Omaimidana epalauti ga likaka wesida depa le aila jiyoko ohuwa hukiki likaka abo maya ne loko liye.

### **Ukulo hosi jamidana emesalo nebo wemidana gala.**

<sup>11</sup><sup>k</sup>Sakoya nomuda huloko mudaobo maya okulumama golotiyoko hosi ja ukulo mako mudaoe. Aya hosi jamidana emesalo nebo wemidana uliwaya libotogo emesalo molokaka ito wehe loko lokaka we loko nebo welimo lihimamu le wehe loko obi obetokaka yowanu ito lowaki yowanuhenaki le opa amoko le anuwalo moloko lekaka noibo weya ne. <sup>12</sup><sup>l</sup>Madonaloya duliki wesi olo jikaka niabo adakolikidana olo jekoko omudalaya jo ulumakidana oko ne. Ito uliwa luhuwala neboya eimolago lepeko elekaka noiye. <sup>13</sup>Ito upalo nesa hana-pana maya olada hilimikayoko, ito uliwa Omailimo libotogo nebo we. <sup>14</sup>Emoya nebo weya okulumauti imiki we wavu-liki dupalo nesaya uluwitibo ukulogo olo jikiki hosi ja ukulosida demesalo maya yowiki minikiki emesalo moliki wae. <sup>15</sup><sup>m</sup>Epalauti maya sopolu hana emitia naibo makoya yowenebototi maya numuto namato wewenasida kohaidoko asebetatiye, ito aeni akusa mako le-minoko ujapa obetakolaiye, ito Omai ode amode nesa lekaka wemamo emoda mesaha jitatabo wewenasida maya mesahala lahelametibo le soto moloko lihimanipo le pasobetokaka yowanu maya lekolaiye. <sup>16</sup>Upalo nesalo ito uhanaloya uliwa sa-loko jene: Muki duliki wesida duliki wenipo ito muki ujapa wesida ujapa wenipoe loko jene.

<sup>17</sup><sup>n</sup>Sa-oneyoko, nomuda hulo moloko okanaki we mako homidana lamedalalo sinoneyoko mudaoe. Sakoya sino-minoko namahena maya oli-liki wiki nisiki niayoko mukiya ga napauti ju loko sa-loko lo biye: Omailimoya nodenesa napa le lolu noiyo, nisiki li esa ilo. <sup>18</sup>Sa-ikiki ujapa wesida milawanipo ito lowalo ujapa ikaka niabo wesida dupa milawanipo ito elewole wesida dupa milawanipo ito hosi jasida ito lowa wesida dupa milawanipo ito muki wewenasida elekele oluhonipo ito nalau minamiki aha minabo wewenaya yowiki limiki minabo wewenasida dupa milawanipohena maya natae loko liye.

<sup>19</sup>Sa-iyoko, nemoya adoha okohimi nesa ito numuto namato wewenasida ujapa wenipo ito oluho unamotalaki nisiki li esa ikiki minayoko mudaoe. Edimosidaya ukulo hosi jamidana emesalo nebo wemaki ito unamotalaki lowa he betune liki nise. <sup>20</sup><sup>o</sup>Ito adoha okohimi nesaki ito suwa ga lo-lele wemakiya okohimi nesalamidana omudalaloya elewole ane aito-aitomidana le soto molaibo wekiya dadelo le. Aya suwa

<sup>k</sup> 19:11 Sam 96:13; Aes 11:4   <sup>l</sup> 19:12 Den 10:6   <sup>m</sup> 19:15 Sam 2:9; Aes 63:3; Lev 14:20

<sup>n</sup> 19:17-18 Iji 39:17-20   <sup>o</sup> 19:20 Lev 13:1-18

ga lo-lele welimoya omutoko adoha okohimi nesamidana luhuwala lenebolawa ito wewena di bola hiki lipi mikaka abo wewenahenasida sakoya elewole ane le soto moloka moloka idanaki, dukanipo maya le opa iye. Edimoki adoha okohimi nesakiya ohatama dilipe-loko jolaki nowakiya sihuga ehada makoya jo loko neboku hulobetokaiyoko ayau maya lemeiye.<sup>21</sup> Sakoya limikaiyoko, unamotalalesida maya ukulo hosilo nebo wemamidana epauti sopolو hana yowenebomamoya lemekoko kohaidoko esa iye. Sa-okaiyoko, namahenamasiya nisikiki dupa milawanipohena maya niki niki dohumanipo ae.

**Meleke 1,000-midana gala.**

## **20**

<sup>1</sup> Sa-okaiyoko, okulumauti okanaki we mako limiyoko mudaoboya lokumidana kiwaya ito seni napa-napa makokiya adelau leneyoko mudaoe. <sup>2<sup>a</sup></sup> Emoya adoha oletehamidana hapa yeikala nebo Olohamidana ilo adelo lekoko leko woko hulo nala numuku moladeko meleke 1 tauseni netiye loko loetaiye. <sup>3</sup> Loko lotokoko ipisoko aleu hulikaiyoko limiye. Sakoya lemekaiyoko ateda epalo maya etoha oko vokoko humaloti moloko le etoha ibo maya numuto namato wewenasida aku moneko dukanipo le opa-napa obetamoko aha mino-loko woko meleke 1 tauseni le hulikoko anu siyetadeko niseko onawa minawasi netiye loko loetaiye.

<sup>4<sup>a</sup></sup> Ito muda towaloka molobo maya, onowenipoki siya minayoko mudaide. Sakoya nomudaoyoko, ayalo nisiki minimi wabo wewenasida lahelamibo nesanipomu obi yowanu maya libitatae loko lobetaibo wewena, ito Jisesida gala li soto moliki Omaimidana gala maya domoda wamiyoko etoha iki liminayoko, enonipo hukimi wabo wewenasida weunipo maya mudaoe. Edimoya okohimi nesa adoha, ito aya nesamidana weuna di bola hi biki lipi mamabolawa, ito anelaya otipanipolo molamabolawa, ito li dadeu molamabolawasida maya mudaide. Enonipo hukiminabokuti mayaaku sinikiki Jisesileki duliki wesi likaka yowanu maya liki minadeko, meleke 1 tauseniya wekolaiye. <sup>5</sup> Heliki wabo wewena maloka maya sinamayoko, meleke 1 tauseni maya wetiye liki ewa iki aha minae. Helebokuti sinikakawa maya mudaoboya naba 1-ya ne. <sup>6</sup> Aya helikakakuti sinikaka nesalo koli miki minabo wewenasiya mulunipou lalo eliki eto iki minae. Yamidana wewenaya helekaka nesa naba 2-limoya dupalo lamekolaiye. Edimoya Kalaestitoka ito Omailokaya jokila hi bikaka weya minakilae. Sakiya edimokiya Jisesileki duliki wesida yowanunipoma li-liki niwideko mekele 1 tauseni wekolaiye.

**Olohama lina woko tolowa etibo.**

<sup>7</sup> Sakoya meleke 1 tauseni maya suwokadeko, Olohamidana maya nala numukuti maya le hulo hetoka moloetokadeko, akuya

nisekolaiye.<sup>8</sup> <sup>r</sup>Sakoya nisekoko muki numuto namato mika yowibokuka limibokukakiya ito Gogo mikauka ito Magogo mikaukakiya muki wewenasida maya moneko duka le opa-napa obikoko dilipe nei hekoko ula molokadeko lowa hetune liki li esa ikilae. Ay a wewenasida nabani poya no ake suda liki minanako, lepeko ma lepe suwamekolane. <sup>9</sup>Sakiya aya wewenasiya nisikiki mika eleda makomaloya wiki Omaiki omiki minabo wewena maya Omailimo umula helenebo ebala Jelusalemuga maya wiki aya wewenasida maya lowa he betune liki li wego ikilae. Sa-nideko, okulumauti maya jolimo lemekoko lowe-ludowe ekolaiye. <sup>10</sup>Sa-okadeko, Oloha maya moneko wewena duka le opa-napa ibo wemakiya liwe jolimo sihuga ehada loko netiboku maya ipiso hulikadeko lemekolaiye. Adoha okohimi nesaki ito suwa monoka lo-lele monekaka wemakiya ayau maya omutiki limiki miniki ewa iki minaibokuya lemekolaiye. Ay a wesida maya Olohamaki asowalaki nesa ohhibitikadeko, muki yupeka maya miluma eliki wije nama iwa iwa iki minakilae.

### **Onowelaki siya ukulomalo obi itabo ga.**

<sup>11</sup> <sup>s</sup>Sa-okaiyoko, onowelaki siya napa-napa ukulo mako mudaoe. Ay a siyalo nebo wemidana okepalo mudaoboya, okulumaki maya mikakiya emo omudalokati oli ikiki yalo maya nisiki soto pamaiye. <sup>12</sup>Ito helebo wewena muki yowi-minabolawa ito limi-minabolawaya onowelaki siyamalo Omaimidana okepaloka nisiki sini-minayoko mudaoe. Sa-niayoko, siyalo nebo welimoya buku mako leko talone. Makoya le taliyoko mudaoboya, elewole depa mutiwa li-minabo wewenasida dulinipo je molaibo buku maya molo amaitoka oikoko ne. Sakoya minoko helebo wewenahena maya omutiki aha miniki iki moliki abo monawanipohenamuya aya bukugu luhuwa ji-minaboto obi yowanu nolebetaiyoko minae. <sup>13</sup>Sakoya aya onawalo maya ela noku helebo wewenamakiya akuya dilipe-loko nisiye. Ito aha helebohena ito loku helebohena maya akuya dilipe-loko nisiye. Sa-iboya aya heliki wabo wewena mukiya iki moliki abo monawanipohenama le soto moloko pasobetaiye. <sup>14</sup>Sakokoya helebo wewenaki ito jo ebaku minabosidakiya joki nohuku maya dipisoko hulikaiyoko leme. Sa-iyoko, yatoka nesalimoya helikaka nesa naba 2 maya lolono iye. <sup>15</sup>Ito wewena makoya elewole depa mutiwa li-minabo wewenasida dulinipo luhuwa je molaibo bukugu minamibo wewenasida maya joki nohuku maya dipiso hulikaiyoko limiki minae.

<sup>r</sup> 20:8 Iji 38:2,9,15    <sup>s</sup> 20:11-12 Den 7:9-10

**Okulumua ohatamaki ito mika ohatamakiya soto pitiye.**

**21** <sup>1</sup>tOkulumua asehawaki ito mika asehawakiya wiki aha nesa lolo ikaiyoko, ito ela no maya woko aha nesa lolo onebo nenako, sakokoya okulumua ohatamaki mika ohatamakiya mudaoe. <sup>2</sup>uIto eto onebo eba mako ohatamaya okulumauti Jelusalemu eba maya Omailoti limiyoko mudaoboya, we mako menala ada iki limi mikilayoko onowela kolokoko nebomidana oko neyoko mudaoe. <sup>3</sup>vSa-okaiyoko, onowelaki siyaloti maya ga napa mako sa-loko eloe: Mudalo, Omaimidana numudala ebala maya muki wewenasida dowisaloya soto nopyio. Emoya dukau nedeko edimoya wewenala yuha lolo iki minakilae. Eimolakahoya edimotoka mino moloko minoko Omainipoya minakolaiye. <sup>4</sup>wOmailimo eimolakahoya domuda nouvala le hulakolaiye. Heleko wije nama oko miluma eleko lelote lelote wokaka nesa maya lina suwokadeko aku soto pamekolaiye. Yamidana asehawa nesaya woko aha nesa lolo ekolaiye, loko liye.

<sup>5</sup>Ito onowelaki siyalo nebo wemamo sa-loko lo nimiye: Mudao. Nemoya muki nesa maya ohatamago le soto molo-loko woyo, aya nesamuya luhuwa jo. Maya gaya wehe loko ulawa lokoyoko, niseko ulolotokaka noiye. <sup>6</sup>xLoko sa-loko liye: Le wehe loko suwokoe. Nemoya omutoko nisitibo nesa ito alika nisitibo nesamidana le api okaka ito le suwokaka aholaya minoe. Wewena mako notipomu delatiboya, nemotokatiya elewole depa mutiwa likaka no hihuautiya hiki niki mini-liki wiki minatae loko aha yatoka libekoloe. <sup>7</sup>yWewena mako monokauya elewole iki mini-liki wiki Olohamidana lowala maya asitiki minatabolikaya maya nesaya likilae. Sa-itaboya, nemoya Omaitypo lolo oko minoyoko, edimoya nemo oluhone lolo iki minakilae. <sup>8</sup>zSa-oneboy, asowalaki nesamu oli abo wewena, ito maya monokamuya demesa mikaka niabo wewena, ito huma-hama nesa lolo ikaka niabo wewena, ito maloka wewenasida kohaidi helikaka niabo wewena, ito we olisa mena olisalo wewena, ito iheda yahamedalo wewena, ito suwalo wewena, ito luwehalo wewenaya muki yamidana lahelamibo nesa lolo ikaka niabo wewenasida numudanipo ebanipolokaya joki no ohunauka yomaya sihuga ehada jo loko netiboku minatae loko lonebo maya ne. Yatoka nesalimoya helikaka nesa naba 2 maya lolo one.

**Jelusalemu eba ohatama soto pitiye.**

<sup>9</sup>Ito okananipoki we 7-palasiya lapenipouya lowa-lawa nesa waitokaiyoko li-minabokutiya makomalimoya nemotoka niseko sa-

---

<sup>t</sup> 21:1 2 Pit 3:13; Aes 52:1; Lev 3:12    <sup>u</sup> 21:2 Aes 61:10    <sup>v</sup> 21:3 Iji 37:27    <sup>w</sup> 21:4 Aes 25:8;  
Aes 35:10; Aes 65:19    <sup>x</sup> 21:6 Aes 55:1    <sup>y</sup> 21:7 2 Sam 7:14

loko liye: Niso. Omaimidana sipisipi ja akalewamamidana lemo mitibo menakidana niabo wewena maya ilipituyo.<sup>10</sup><sup>z</sup> Loko lokoko nukane maya le wili jekoko nilime-loko bola hana-pana makomau yoweko eto onebo eba Jelusalemu eba maya Omailokati okulumauti maya nolimiyoko nilipiyoko mudaoe.<sup>11</sup> Omaimidana lamedala maya yalo maya neyoko, ebalamidana okepaloya ehada meinawa yoweko nebo ehada jasipae liki likaka niabo ehadakidanaya okepaloti maya lameda liye.<sup>12</sup><sup>a</sup> Lili oho makoya numudamidana le ulau moloko neboya atedawayaya 12-pala nebo ne. Ito ateda makokolo makokoloya okananipoki we minabo ne. Aya ateto maya Isilaelo wewena nala 12-palasida dulnipoma luhuwa je molokaiyoko neyoko mudaoe.<sup>13</sup> Ho noywibotokaya ateda loweki makoki ito apila malokaya asako ito malokaya asako ito ho nolimibotokaya asako neyoko mudaoe.<sup>14</sup> Aya atedasida ahodawanipoya 12-pala nenako, yamidana mupilaloya Omaimidana sipisipi jalnidana aposolola 12-palasida duliya luhuwa ji molikayoko minomo wone.

<sup>15</sup><sup>b</sup> Okanaki we ga lo nimbo welimoya akusalaya goliloti lolo abo akusala lenebototiya numuda eba ito numuda ateda ito oho lili hanawa ito minawayaya makimi okaka akusaya lene.<sup>16</sup> Aya ebamidana hanawa yowenebolawaki ito lemenebolawakiya makoko aweyaha oko ne. Okanaki wemamo hanawaloka makimi oko mudaiboya, 2,400 kilomitaya neyoko mudaiye. Sa-okoya yowenebolawa ito lemenebolawaya makoko aweyaha okogo ne.<sup>17</sup> Ito oho liliimidana hanawayaya 66 mitamidana oko ne. Wewenalika makimi okaka noudawo nesa leko okanaki welimoya le-minoko makimi noiyoko mudaoe.<sup>18</sup><sup>c</sup> Numuda atedawayaya ukulo ehada uliwa jasipao liki nilabo ehadalotigoya lolo okaiyoko ne. Ito aya numuda ebaya goli ehada ukulo hae-paetoko ito apokapomidana pana-pana keko nebo nesalotiya vikayoko ne.<sup>19</sup> Aya numudamidana ahodawayaya ehada meinawa yoweko nebottotiya le hemo wiye. Ahodawa naba 1-ya meinawa yoweko nebo ukulo ehada uliwa jasipae loko nebo ehadalotiya le hiye. Ito ahodawa naba 2-ya okuluma elibo ehadakidana uliwa sapaiyae loko nebottotiya le hiye. Ito ahodawa naba 3-ya agata ehadaya sihugalotiya le hiye. Ito ahoda naba 4-ya ohugo ehada uliwa emalaliyo loko nebottotiya le hiye.<sup>20</sup> Ito ahoda naba 5 maya ukuloki lahoki nebo ehada uliwa satonikisiyo loko nebo ehadalotiya le hiye. Ito ahoda naba 6 maya laho ehada koniliyanijo loko nebo ehadalotiya le hiye. Ahoda naba 7 maya sihuga ehada uliwa kalisalatiyo loko nebo ehatotiya le hiye. Ahoda naba 8 maya ohugo ehada uliwa pelilo loko nebo ehadalotiya le hiye. Ahoda naba 9 maya sihuga ehada uliwa topasiyo loko nebo ehatotiya le hiye. Ahoda naba 10 maya ohugo ehada uliwa kilisopelesiyo loko nebo ehatotiya le hiye. Ahoda naba 11 maya mika uhi elenebo ehada uliwa hayasiniyo loko nebottotiya le hiye. Ahoda naba 12 maya laho ehada uliwa ametisiyo

<sup>z</sup> 21:10 Iji 40:2   <sup>a</sup> 21:12 Iji 48:30-35   <sup>b</sup> 21:15 Iji 40:3   <sup>c</sup> 21:18-21 Aes 54:11-12

loko nebo ehatotiya le hiye.<sup>21</sup> Ito ateda 12 maya ukulo peseku 12 meinawa yoweko nebotoyi le hiye. Ateda makoko makokoya napa-napa peseku makokolotigoya lolo iye. Ito numutoka anuya goliloti lolo okaiyoko nenako, ayalokati tokamaya apo-kapokidana pana-pana keko ne.

<sup>22</sup> We napate Omaiya ode amode nesa lolo okaka we ito sipisipi ja akalewalimoya monoka numuda napa maya lolo noibo nenako, ayaloya monoka numudaya minamiyoko mudaoe.<sup>23</sup><sup>d</sup>Ito Omailidana onowelaki lamedalalimoya he lameda letiyo, ito sipisipi ja akalewamamoya le lolo okoko minakolainako, aya ebatokaya ukadalimo ito holimo lameda letibo nesa leko minamiye.<sup>24</sup><sup>e</sup>Sa-onenako, muki numuto namato wewenasiya aya ebamidana lamedalauya monikilae. Ito numuto namato duliki wesiya onowenipoya ya ebatokagoya liki wikilae.<sup>25</sup><sup>f</sup>Aya ebakuya lubu jeko go loko amekolaiye. Sa-onenako, aya ebamidana atedawaya holiyakidana golotokoko minakolaiye.<sup>26</sup> Numuto namato duliki wewenasiya onowe meinawa yoweko nebo nesaya aya ebakuya li-liki wiki li soto pikilae.<sup>27</sup><sup>g</sup>Nuwama nesa mako ayauya yowamekolaiye. Ito owanipo luwitibo nesa mako litabo wewena ito suwa-sawa nesa li-minatabo wewena aya ebakuya wamikilae. Ulinipoya Omailidana jala akalewalimo elewole depa mutiwa li-minabo wewenasida dulinipoya bukugu luhuwa je molaibo wewenasiyoga aya ebakuya yowikilae.

**22** <sup>1</sup><sup>h</sup>Okanaki wemamo minowa minowa okaka no makoya nilipiyoko mudaobo noya uluwitibo no neyoko mudaoe. Sa-iyoko, Omaiki ito sipisipi jala akalewamaki onowelaki siyanipolo amaeukukati aya ebamidana luwakuma nowiyoko mudaoe.<sup>2</sup><sup>i</sup>Ito aya nomidana apila maloka malokaya elewole depa mutiwa le soto okaka yamidana ihilawa aito-aitomidana 12-pala ukada onawaloya jeko halatokaka noiye. Sa-onenako, muki numuto namato wewenasiya aya ya ihilawa maya niki delaibo nesauti maya haka liki minakilae.

<sup>3</sup>Sa-oneboya, aya ebakuya nosamibo nesa mako minamekolaiye. Omaiki ito eimola sipisipi jalakiya onowelaki siyanipoma yauya soto pekadeko, muki wewenalale yuhasiya elekele itiki minakilae.<sup>4</sup>Ito okepa omudala maya muda-minakilae. Ito uliwamidana luhuvala maya domodaloka yowaya soto pekadeko minakilae.<sup>5</sup><sup>j</sup>Ito aya ebatoya lubu jamekolaiye. Ito Omainipolimoya lamedanipo bideko minakilanako, lamuhe ito homidana lamedalaya ma soto pamekolaiye. Ito aya eba aholasiya duliki wesi likaka niabo yowanuya li-liki wiki minakilae.

### Jisesi maya aku le wili jeko nisitibo ga.

<sup>6</sup>Ito okanaki wemamo sa-loko lo nimiye: Maya gaya letuboya niseko ulolotokaka gaya ne. We napa Omailimoya epalauti ga likaka wesida

<sup>d</sup> 21:23 Aes 60:19-20    <sup>e</sup> 21:24 Aes 60:3    <sup>f</sup> 21:25 Aes 60:11    <sup>g</sup> 21:27 Aes 52:1

<sup>h</sup> 22:1 Iji 47:1    <sup>i</sup> 22:2 Jen 2:9    <sup>j</sup> 22:5 Aes 60:19; Den 7:18

le depau molokaka ibo welimoya okanaki welada maya oli hekaiyoko onawa hana amideko soto pitiye loko lonebo nesa maya elekele welasi elitae loko lo emeko ilipiyoko mudakame.

<sup>7</sup>Ito Jisesikahoya sa-loko noliye: Ele-minape. Nemoya enemane oko yaitaya wekoloe. Ito maya bukuguya ohuwa hukoko gaya luhuwa je molaiboya moletiki ujapa iki li-minatabo wewenasiya elowa jiki minakilae, loko liye.

<sup>8</sup>Ito nemo Jonikahoya muki monawa-hanawala mudako ele suwobo ne. Sakoya mudako ele suwokoko okanaki welimoya maya nesaya nilipekolaiyoko, woko iguka maya lipeko ni bola he mekoloyoko, sa-loko lo nimiye: <sup>9</sup>Sakoya samo. Nemoya elekele we iwekaya minoe. Ito Omaimidana epalauti ga likaka wesida iwenipoya minoe. Ito maya bukugu aya moletiki li-minatabo wewenasida iwenipo minoe. Sa-onenako, emoya Omai makokomidanago lipe mitane. <sup>10</sup>Loko lokoko sa-loko lo nimiye: Emoya maya bukumidana ohuwa hukaibo gaya le suna amo. Aya gaya niseko ulolotetibo onawayaya aloya alili okaiye. <sup>11</sup><sup>k</sup>Sa-onenako, lahelamibo nesa lolo ikaka niabo wewenasiya asaikigo minatae. Sakiya duka uluwitamibo minatune liki labo wewenasiya ayamidana yatoka minatae. Ito monokau wehe liki minatabo wewena maya asaikiya wehe likigo mini-liki wiki minatae. Ito eto iki minatabolawaya asaiki eto ikigo mini-liki wiki minatae.

<sup>12</sup><sup>l</sup>Ito Jisesimamo sa-loko liye: Enemane oko wekoloe. Sakoya woko lihimatipohena maya pasoko libituwe loko wekoloe. Sakoya muki wewenasiya iki moliki abo lihimatipohena maya makoko aweyaha oko pasoko libituwe loko leko wekoloe. <sup>13</sup><sup>m</sup>Nemoya omutoko alika moloko minokaka we api okakamidana ito suwokakamidana ahola minoe. <sup>14</sup><sup>n</sup>Dupalo nesakidana iki dukanipo nokalawe iki li uluwitiki li ukulo lolo ikaka wewenasiadamaya eloyoko wehe lokaka noiye. Edimosiya elewole oko minokakamidana ya ihilawama natae, ito maya ebamidana atekuya yowitae. <sup>15</sup>Ito iheda nalisalo wewena, ito we olisa mena olisalo wewena, ito malokasida kohaidi helikaka wewena, ito luwehalo wewena, ito suwa-sawalo wewenaya numuda hetokaya minakilae. <sup>16</sup>Nemo Jisesikaho okananeki weya oli hekoyoko, lemeko nemo wewenanele yuhaside maya nemo gane maya lo soto moloko lo libitiye. Nemoya Dewitida awola ito eimola nalalauti weya minoko sonohi napa ludaka mudaokaka noudawo abili duma-dumakidana lamedane nebo weya minoe, loko liye.

<sup>17</sup><sup>o</sup>Omaimidana weuna oluholimo ito sipisipi jalakidana menakidana minabo wewenasiya niso liki likaka niae. Sa-onenako, maya gaya elitabo wewenasiya asaikiya niso liki litabokumuye. Ito minowa minowa oko

<sup>k</sup> 22:11 Den 12:10   <sup>l</sup> 22:12 Aes 40:10   <sup>m</sup> 22:13 Lev 1:8,17   <sup>n</sup> 22:14 Jen 2:9

<sup>o</sup> 22:17 Aes 55:1

minokaka nomuya delokadeko maya nisiki malokatiya hiki natayo, nisilo. Aya noya natune liki maya meinawa minametibo aha yatoka nisiki natayo, nisilo.

<sup>18</sup><sup>p</sup>Maya bukugu ohuwa hukoko luhuwa ji-minabo gaya lepiki elitabo wewenasida maya ehe loko data leko letuyo, elilo. Wewena mako edimonipo data eliki maya je nomolobo galoya ga mako amida mitabo wewenasidaya Omailimo maya bukugu lowa-lawa nesa luhuwa je molominobo nesaloya amida miki likatayo, ehe. <sup>19</sup>Ito maya bukuguya ohuwa hukoko gautiya ga mako huki hulatabo wewenasitokaya Omailimoya elewole oko minokaka yamidana ihilawaya ito eto onebo ebala maya mosebetakolaiye. Sa-etibo gala maya aloya maya bukuguya luhuwa je molokoyoko ne.

<sup>20</sup>Maya lo soto molaibo gaya he elowo oetokaka welimoya sa-loko noliye: Watiyae, alo yaitaya wekoloe.

<sup>21</sup>Yotokoe. We napate Jisesilikaya, alo niso. Sa-ideko We napate Jisesida nasahililamoya edimotoka mino moloko minadeyo.